

月

二

江韻聿氏詩

大合樂古於氏曰
 零聚於拾拾園
 拜觀於自睡不醒
 片廣最下

經遺堂全集卷之七

五言四

江都韋佩金西山

贈安陸程十七明府石浦

德潤



清才如芹子到口乍嫌澁志士如蓮葉受雨不肯溼官裏
 獨蕭然舊齋支雅葺粘壁皆古心天壤佳士集此間有主
 人豈蹈塵吏習摯語鑒夙忱感我衰髮立碧山閒終古出
 郭有底急城北三十里白兆山卽李白碧山蠟屐相招邀欲盡無上級新
 政被花柳秀色開原隰謫仙久歸去應嗟不相及湏水雖
 細流在山清可汲舒舒漢之廣虛懷待其入人生好推移
 見在心一粒何苦學籃蛤閉口護腥汁陳人望利器傷手
 懼莫執枯腸似蟲俯被暖思啟蟄歌君雨隨車送我風飄

笠楚尾再難騎空勞詠駒繫

小憩新鄭二日贈邱大明府墨泉

世俊

骨人住肉山開堂忽焉散瞎馬臨深池夜半不知憚前歡
寂無在老遇劇可歎百年那易滿還作未了案驅車聞琴
聲徑就君乎館緇衣昔所宜溱水今不渙身手靖京索供
乏到羈竄我坐九幽底肯借燭光爛桑梓海東頭萬里如
借煖雪涕到泛愛公論幸邀道迨我乞骸歸君早頭銜換
當和誰嗣歌用繼此章亂

歐陽文忠公墓

新鄭縣東二里

河嶽天降神有宋翊鼎盛宰相本大儒立朝引衆正致君
三代下仁哉嘉祐聖陪葬失從輦遺阡迺在鄭委形豈衆
殊日星耿直性都忘夷陵貶因地殫善政守滁卽稱翁其
時未衰病久矣一生死順化樂天命重臣完名終哀榮餘
難更至今讀遺書藹然得春令匪直變文體正學首主盟
蘇曾助張翼朱程起後勁當年行樂處草木尙可敬何況
久此藏原土應自慶何年招梅石棲魂來合并

南山五首

南山嵩華根一青遠相引有如詩在胷欲茹不得忍杜陵
志諸葛屢詠辭益懇無命欲如何賊懿笑星隕按壘歎奇
才讎也論則允士伸以真知虛拘且覲閔十年不識字百
計免忌恨恥以文章進甘爲吏能窘韋編終自珍判骨與
俱番不見人外花倚牆抱春盡

幼讀河上詩老度河上橋杜叟善論兵略解清人嘲令嚴
闔寄重但益主將驕全資別部力耳目豈不消有人功第
一印斗賜珥貂李蔡居下中封侯迺早邀與臺相照耀金
紫各在腰道路坐歎息猿臂枉自勞無功亦何有結轡天
山高迺知種陰禍原不在逍遙

一紀羈官身官罷髮全素何殊花時病病起春已去人老
情易悲鰥獨更遠戍甫也舊居鞏秦蜀傷寄寓尙喜家室
至沈慟出佳句君詩有二別其二爲我賦衰慈攜弱妾漂
蕩嶺外住少壯長已矣又奪白頭聚殘軀仗忠信萬里行
不顧杜陵畏消息我無書來處遊子懼親年我年漸可懼
骨月隨夢來未語忽驚寤

友死哭之寢繼聞道路傳先後忍拋我不與共故山城西
過橋原水碧柳一灣盛氣無避忌曾指卜墓田山貲足公
等銘誌我任焉花飛不著樹雨落不上天君爲溝中斷我
爲出山泉官裏未了債壓溺仍得全方卜遂首邱豈知貽
後艱何時一尊酒上冢澆君前

遠益魑魅喜愁廢山川春我行日以孤所見日以新匪無
傾蓋交厚薄皆風塵夜月遲上天豈知星在晨出交天下
士那有小小親昔友如齒落飢飢一二存顏色仰屋梁然
疑關塞魂江漢更淮汝我行所度津巖程獨西上不同趨
海濱詩成亦安用書付東南雲

夜發臨潼

昨浴朝元湯全卻華清暑夢迴秋氣先夜得青山古辭櫪
騰馬心覓路續鈴語灩灩湛露下霏霏白烟吐稍添曉帘
重漸激風衣忤啟明睽欲流殘魄仄未午初暄迓來翼方
遠辨前侶山明素滄陰天長渭南滄嗟予久行役望此舊
關輔有人霸陵回抱鞍馱殘雨

發平涼

祁山長安首安定秦隴門圖志揔三輔控帶遙五原苻姚
搆兵爭乞伏逮赫連得失危置碁莫定觸與蠻略地罕能
守結壘幾見完豎土戴戰骨纍纍積成山兇危懺已晚布
金釋煩寃不知何王代力致梵夾尊至今紺宇牢輝煌樹
中天霸圖旣消歇香火未全湮登城夕照多第一高平關
關中莽蕭蕭但見八水奔膏腴流難盡預憂民氣乾獨客
會當發記錄勞心魂

柳湖

將發尋薄遊絲絲出城雨柳意颯已秋客鬢疎同數最愛
平淺流沍沍未成聚漾碧草虛沈漉涼葉齊俯但飲官裏
水飲水亭盡卻人間暑避暑樓伊誰出世人揭此洗心語春船
別瀟湘魂夢空舫浦塵蹤老何幸一嗽清如許因嗟此邦
士大好林泉主景略不仕秦胡叟長辭呂高臥遂棲真好
爵焉得取

回中

長劍擲天外防身倚崆峒隴山迤北上一朶凌蒼穹坐制

五涼命首倡百川東

涇水源出筭頭山為隴東第一水

仙路望西海相傳

漢回中八駿騁已極天馬徠何雄瑤池宴日暮荒唐少成
功豈惟輪臺悔太史譏乾封法駕久不過蕭條山澤空樂
府上之回摹古多異同但崇閒祠祀不睹舊離官夷猶度
層水務面傷金風

瓦亭驛

隴阪行一日合沓山勢陡風雲會雍涼深入瓦亭口太原
曾宣料焦獲實禹藪重地河以南全於此徑取當年靈武
績急救延秋走藉非朔方軍唐室復何有涇原置節度聯
絡北地守甯料逼奉天邊防日紛糅西夏竊關輔內掣統
萬肘形勢此中斷計出魏人後興亡閱前代鬱勃石氣厚
錯忤在人事山川豈甘受史書載盈車老袖述作手茅屋
出仰天高涼數星斗

瓦亭峽

衆山搏沙成絕壁屹如削正當愁梯緣縹緲出懸閣兩崖
對欲合千怒併一落長風轉峽急片羽不容泊天教足水
府客過碾車腳身當沙石衝劇任蛟龍作入海萬里遙力
雪此水弱適來山腰磴已被前波掠清涼濺衣裳艱難出
冥漠非有長定心焉能色無忤

六盤山

人馬如浮出天近地偏窄盤盤裊虛空搖搖入雲隙其上
連飛鳥下爲千仞宅想見開闢初鑿土如鑿石騎危一回

顧始死見所歷絕頂晴亦雪升喬午疑夕我僕忽就臥倉
卒肢體直獐麟怒更號催作不言客瘦骨藉暖人歸魂墮
遙翼頽陽照病面慘澹各黃白前騎降在原後車繞穹壁
人聲不成畚引睇如咫尺出沒疑鬼神曲互赴轍跡艱險
迺自茲九折毋傷役

七十二澗

天厭羣山連巨掌擘石縫一脈中斷絕不顧山骨痛百轉
赴脩壑千仞夾長術奔崩萬馬來步步皆瀕洞忍拋過客
命全與波臣共捫摸厓壁滑跳盪血肉重登木窮彼岵鉤
援窘鑿空東西五十里頑狻謝撐縱駭流噬人慣并力那
任闕閒行頻過涉迴複徑錯綜稍幸窮獨骨神靈屏不用
入谷了未迷出險恍如夢城南桃花寺香燈禮徒衆

青嵐山

近塞道彌惡西上迺獨善森森天骨張戎戎石狀變高企
澤秀椒下矚人耕甸都忘所入深深淺益一片茲山開最
晚更讓六盤先出當割據後未經元黃戰中含太古碧不
受好春絢况照本色人肯自慳真面粗醜數千里窈窕罕
可見判從嵩華外莫附名山傳深維造化力在遠尙不倦
一曠江湖心復此草堂戀

山下驛舍
殊閒雅

會甯縣新橋

岸絕鳥墮水天傾雲陷霄支撐橫死骨澗草肥人膏真路
通地絕兩山氣初交英靈聚上頭一力當空寥豈敢鶩虛

無根本附已牢締構自世間丁甲默不驕客來讀亭額振
策截秋飈但覺青嶂動不知馬足高回首忽嫌身未視目
先逃想君經營苦益我手髮焦都占履道坦跋涉夫何勞
波浪高如山更度黃河橋

青嵐山店壁見黃大葯林驛寄楊大蓉裳芳墨梅

詩四首知兩君在蘭州

梅花與名士度隴見來少少見幸得聞非真畫亦好卅年
一寸心引之彌長道消息坐待我兩賢宰相保雪鴻痕不
孤雲鶴望逾矯響山應東鐘傳言介高鳥氣味非差池關
山豈能杏來尋歲寒約各自花時老

臯蘭寓齋讀黃大葯林新詩却贈

君才最清華恰與所居稱楊荔裳方伯館君於水木清華園寥寥天際心

一洗秋雨淨想見展霜縑高懷軼九詠塔山影遙青風泉
漱虛聽臨水照官身了了見鶴性試除白雲外一字不敢
贈髯翁大坦率銅琶故下乘但有學畫竹許我放筆硬

河水歌有姪同谷歌有弟我母况天南八十張遠睇君方
氣百倍不泊坐風利猶當搖落期虛舟悵難繫宦轍判十
年河漢各分濟得逢窮塞主將老暫捧袂何殊繁花開未
靚隔牆麗憑仗有心人留眼看霜蒂高寒急授衣蹉跎欲
徂歲秋燕勢如客簾戶頻復詣最感諒倔强示我詩律細
白頭作兒啼吞聲窘篇製

九言會韋大書城

興化黃驛葯林

有客西來欲別不忍別與我話舊同上蘭山峰此時秋
之爲氣未蕭瑟一葉將落未落青梧桐坂長坂高矗矗
更鬱鬱泉清泉冷漾漾還溶溶空餘長劍耿耿倚天外
誰知抑塞磊落之心胸君官粵西已十有餘載傳聞惠
政漸漬蘇疲瘵流光荏苒忽醒一春夢手揮五絃目送
冥冥鴻飄然一葉之舟原不繫涉湘江水只合攀芙蓉
涼風天末頓令客衣換衣綫密密猶記慈母縫不吹墮
篋亦不鼓琴瑟陟彼岵兮有母之尸饗母畱桂林日夕
倚門望日斷子舍不識其西東風風雨雨努力加餐飯
但有親在不敢嗟塗窮况復君年方盛才更傑天公豈
竟無意憐熒熒我如駑駘下乘走關隴日逐風塵祇覺

增疎慵良朋把臂正復強人意仰視白雲舒卷凌蒼穹
人生遇合豈必致通顯惟有文字緣與性命通秋意疎
疎一逕踏霜草夜吟唧唧四壁聽寒蛩有時兀坐餘事
不挂眼邀我雙管爲畫生枯松不經盤錯不見心與節
閱幾春秋得此冰雪容美玉韞櫝不必求善賈他山之
石可以相磨礪苦心自編詩卷自讎校日費萬錢付與
抄書傭誦君佳句不覺三歎息酒酣耳熱令我心忡忡
明月二十四橋天尺五記得城南昔日常過從卽今攜
手怕折河橋柳玉關以外悵望雲山重他日歸去來兮
闢三徑登堂奉母樂也真融融

蘭州小春偕楊生

元勳勒勳康生

昀

遊崇慶寺周覽蘭

山五泉諸勝晚飲酒仙祠分得攬字

邊風蓬飄零客懷水蕭澹顧我馬且閑何人袂可擊眷言
二三子晨起掩書箴登高遞相引盛氣頗虓闕穿市出層
城心目遠澄澈紅葉表修林疎花孕餘蒼流細絡崩石潦
盡崇蕙蕪碾塵到山根暄晴解衣綉入門瞻佛宇崇慶寺未
禮首先領界畫明雕斲卓立森柱臧廢鐘欵靖難父死祭
未禫輕師燕渡江百憂雉罹爵熱血釁亦甘羣忠爭就盥
兵餘金氣寒想見革除懣攝齊登東峰千佛閣不假鐵絙攬
聯額紛懸綴碑碣釘嵌嵌洞古猿登牀廚清鳥尋糝凭闌
俯方田巴菰照藹晦潤賴窮丁浥賣供粗官噉捋茶省秋
悲采茶厭山喊側為第一峰東龍口甌建注於窻紙磨屑竹

筋水確春藥礮其原較獨遙就下亦最寔符調規泐泐鬯

汲色黝黝降阿過禪房杖笠稱恬憺左旋周閣道過臥佛殿詣文

昌閣殿像垂紘紉天官司祿府侍者各抱槩小憩養腰腳秀

草藉綠毯敲扉然燈寺然燈寺雙松髮垂髭飯堂雖寬閒但

恣饁者喰回首繞閣遊俊味如食欖空透龔屐聲軒豁拓

詩膽西閣極雲際混元閣梵坐危折菡賈餘躋其顛我氣百

勇敢團瓢半虛垂盤磴不軻輶簷端與窗平星月恐被揜

龍尾掉蜿蜒雀離翳霽憲九折隴四圍千里河一覽翠微

西泉源西龍口齧缺經輶輶仄出釋曰汎習險象維坎銜花

馴鹿飲嘯風坐虎耽更無人澣衣難觀魚聚糝餘泉醺小

渠寸碧衾有枕輕浮楹棹子冷浸芙蓉蒼爰循紅柳坡別

築惜稍聞級盡祀酒仙過藏經殿飲酒仙祠座側安竈窳吾生一飽

足聞召開笑領主人况情多當食肯願願易醉困冬暖催

歸苦晝黯明將巖際生風漸竿頭撼行吟犯伊涼思親隔

嶺顛送窮仗筆精抱殘裏卷贖入室羅英才出關忘愁黤

昌黎尙慙丁左氏廼享歎形影隨步趨抑何自視欲衆奇

永日探千古寸心感山川契清娛辭令戒阿媪險韻好紀

游磨厓字新鑿

同作得蘭字

阜蘭 康 昀曉屏

西極逾大宛北門屹賀蘭右爲浩豐水南垠曠枹罕五

涼互起伏層城接巘岼遊山不更上何以攬大觀河長

明半缺隴長錯平磬磴級緣飛樓交林冠高壇久睇景

還遁周尋潦全乾芳孤陰澗燠柳髡陽阿寒上方動星

鐘橫術搖風竿碧滋湔塵袂白雲送歸鞍如何今謫仙

漫同古流官幸酌隱之泉一從舞雩歡曠懷廼旣醉勞

形夫何歎絲竹屏謝傅畫圖擬胡寬結侶隨樵蘇紀遊

藉文翰驥尾附姓字崢嶸穹峰端

送書城夫子出關

阜蘭 楊元勳雲臺

今年蘭山冬最暖諸生喜氣融高館喜逢先生玉堂仙

自忘頭白身戍邊行李霜儉僕星稀手把松枝驚四筵

高文甯以作吏廢未有大儒不循吏醉墨揮洒何淋漓

行行父老清江淚杯酒之仁亦尋常英氣曠懷成老蒼

瓣香廼於歧路藝廣大教主許升堂將移我情拂塵慮

歎息成連竟成去三月古琴秋燭彈萬里長河晚橋渡
記隨蘭山射鵬歸走筆授我遊山詩天然圖畫連關塞
過眼雲烟愴夢思贈言落落揮杯冷別後心期付公等
雪中塵恰斂天梯振衣更上天山頂

楊康二生出蘭州送三十里卽事誌別

殘客飯不飽瘦馬遲出城二子首前路策蹇送我行積陽
趁人遙獨翼連雲征茅檐兀小坐道左相邀迎攜酒自家
釀袖短不掩瓶急持勸冷喫山風吹微醒昨夜畚鄉語前
席倚新聲選調旣不高其辭非難明乞書殊怱怱字作薑
尾形老憎周旋跡義却塗路情明知此別悲慷慨就嚴程
却望入城騎步步皆舊經寥落虛館閉依微講燈青驛子
走止宿明發須侵星

肅州

敷土川天倉分野星木櫃高下得所歸一束中原氣當年
斷右臂此郡最先置五涼四姑臧地靈鬱不遂桓桓武昭
王敢與沮渠貳龍堆耀兵威魚澤感吏治如何未再傳嬴
師墮楚計子姓競殉國後起翔英異太守振衰宗神堯陟
天位至今遺福祿永擅鹽米利我

皇熟籌邊控制付大吏寸地皆縣之牧令親民事亘古未
霑化文物今則備都馴屯防熟不惜轉餉費監司森槩戟
一命盛輿衛邊愁默以消民志迺大畏臨邊倍行賞
臨軒親簡帥得此塞上行益識

朝命貴底須酒如泉昇平市多醉滿酤置牀頭細酌客中
味當路枉交親窮老輒引避行役盡一年呵筆訂遊記

卜隆吉卽事

遊子悲遠役瘦馬疲屢駕亂水兼我心爭投古城下旅榻
塵壘中百計許庶借欲睡愁復停未醉酒先罷泠泠風雪
天寂寂關山夜院中一房客笑語臥相藉畱燈乞主人獨
尋老兵話

除夕次馬連井

路歧古兩關

漢玉門關在今安西州沙州衛西北晉陽關
在今沙州衛西南一百五十里廢壽昌縣

驛穿晉八邑正當水草枯百里斷炊汲壞館門戶空野吠
夜何急際此萬象弭森沈百靈入飢腸對冷竈千漉無一

汗遠村抱薪來積雪燒轉溼我僕十指僵利刃切凍盪嘯
風虎跡深嘶寒馬毛立歲客會已殘悔懼卻復集往事葉
隨颿旣墮何從拾惟餘方寸心耿耿熱可執天星爛明光
不受山鬼泣

星星峽

平沙浩如海古石碾盡爛一朵飛來峰巨掌擘各半山心
旣內養石理不外散暗泉流草根注澗卻復斷方當入山
初但覺馬蹄慢景聚無虛引境新得遙瞰人居同虎偃僧
飯煮鸞鵲幽榻留雲多閒窗借青看月廊老樹垂風殿春
燈亂驛程與流年夜燭光中換怪底尋夢難鈴語歇已旦
南山口風雪次石城子

天山嶽瀆根萬里我循右剗徑通北庭奮噫豁南口乍從
爪緣膝旋窺確連曰初艱漸構奇外坦或善誘暗流帶橋
轉大石趁人走懸鈴多怯聽拒轍無慨受力舉四蹄重勢
逼三面陡客心碾車輪一轉一痛蹂山靈全變色百谷齊
應吼騰雪矯玉龍沈雲晦蒼狗綫天近窮梯冰海渺絕救
孤煙導馬語陰室叱鬼守衆息聚一龕離坐腰被肘甘泉
凍稜底往汲斷鑿手飛廉虐未已西海駕颶母宵深涎窮
骨徑來穴石取計程未及舍得一賒者九過半盼中隆塞
間突前阜銳進構險易知難積畏久生平好奇心到此復
何有

楊家窪

昨風山頂飛今風山根抉那知林央居奧接寒門窟靈掌
擘暫開元陰闕仍結怪底色死灰千古僵不活日腳午澹
昏人氣飽危咽還從絕巘腹飄落太古雪跡滅想去蹄路
斷迷來轍御者籌變通不憚往來迭前車盈膏穿後車側
投轄我行冒鋒稜我僕委豺穴艱難及冥棲驚定意彌契
遙憶車箱人寒深薶難拔亟揮瘖馬去冰鬣裏斷繼割帶
與續繩牽者腕又折飛仙困壑遁薄罪判塊蹶多恐卻載
來已是凍死骨扶持藉微温湯火忌驟熱許歸遠遊魂未
遂山神奪覓睡無乾處捲茅漫裏裂猶勝兀空巖抱肩就
磨威

天山頂

絕塞皇古春蓬蓬萬山上眷言省路難見峴起微盜飛白
稍界塗積素仍冪嶂陟崇後載妨就淺執箕當颺截無倒
吹晷仄同所向迴光斂前照千峰改昔狀潛師遜裴捷設
陷學姜誑翠微欵駐輪上浮窘掉鞅繞水迺疑定投穴已
近葬豈厭入山深坤靈耿多快造物俯孤援天君運奇匠
人馬併一心星月起萬象迨竭三鼓餘渟淖躍飛將夜氣
謝虛擾神力悔遲貺圓旻許捫摸山性失隘防欲從問真
源不待尋色相七十二國顛海嶽極一望濛濛元氣中但
見白雲漲孤虛辰戌周年命庚辛王養成塞上寶天柱翊
雄障

隘門

萬象庖犧初綿綿如欲翁得一水以生銀海獨開闢方祇
遠晃漾圓靈同蕩滴九州幾白壤舉隅苦分析黃牙與蒼
精豈受人力坼網緼諸天青留待萬古色昨騰星宿間明
發各辭直頗煩百計取重脫霄宮籍偏側爲潛淵瞻前全
鬱術落難誇強丈徑不敢量尺橫理得夷庚曲穿衍象乙
驂回戰場怒搶側風艦急方驚下界人旋卷空中跡千盤
赴寸隘萬里偶一隙昔賭登山腳方輿強界畫何如天西
頭并失雲水白窮陰絕域鑿霖雨中原得曠懷破諸劫琢
腎紀前歷出山還見山偕我投有北何物如汝壽永與天
無極

宜禾道中積雪次滴水厓

連山遠相引再上勢彌嶮厓循苦磈礧路轉轟籠從雙輪
繞腸鳴萬狀鬪角悚未塞用蹊間欲崩戴峯豕哀壑沈宿
陰凍澗想春溶爰於舍車便繞屋覓登壘半上稍掠耳獨
步屢決踵尋源詢前汲躡氷聽暗涌爲拾磴級平不顧峰
意聳長嘯萬谷應危蹲衆奇擁高處天風來響增暮寒重
山深客久立四顧色然恐原磽膚起粟鳥絕裘墮瓠蟠根
皆積薪歸莫踏枯茸

織草枯黃蟠根絕大曰
瑣瑣柴塞外賴以舉火

噶順塘

出險五百里原在此山腹碁布森陣圖羅列聚衆族仄身
度絕陁曠望敞虛谷圍長中綿延氣厚外迴複破地無遁
坏壯往定迷復山靈自爲守鬼工夜疑築傾厓漏日斜怪
石當路獨門戶構俶詭蹊徑袤隈隩適過豈仙源前阻又
窮瀆融堅淥未成因平素猶覆信馬遂就深遵巖迺登陸
小憩倚埃牆老兵語我僕宵濟有達官昨赴重淵浴骨委
餉飢蛟魂歸栩栩蛻蝠詫客指前車問程覓來輻冰隨石亂
走路較水難縮生平寡夷塗萬事輸捷足揮鞭謝羣兒窮
老難追逐

北山口

孕奇九州頂出塞矯大觀色醜鍊老骨百刼創險艱元精
莽撐拄萬物力已殫試除日月外衆彫不因寒內氣浩旣
充外理密愈完南北兩山口互執造化關分明崇基階森
稜表城幹倚巖抗獨坐面夷冠高壇東西影畢照沈瀆欲

留難古苔今不青仰同衆星乾危標契亭毒西維鬱盤盤
臨當駐萬馬重銜勒之還當霄更結聚餘力那得慳冥神
變化用顯樹正大閑乾隅重清映地維迴迴環我藉西域
遊爾雅續釋山

送陳葑洲中丞淮入關

商邱陳大中丞世家宿學迎陵姪孫風雅總持金於

庚申暮春抵戍所拜顏幘帷接待殷懇顧金性

不汲汲熱或彌月不一往見夏五洪北江太史

亮吉東旋金與洪齟齬交別二十餘年今相聚窮

荒萬里外於其歸也殆不勝情詩一章中丞大

稱賞以國士許焉中丞有所往輒於衆中覓金

招與論詩法源流古今詞體正變國朝諸大

家著作優劣持金片楮小篇玩味往復不肯置

促金校定詩古文詞藁本允異日爲付梓人又

以金處困無幾微戚戚介於色與人相接泊然

無所求庶幾不失已以是指稱之爲延譽於大

人長者前益力吁知己哉中丞伯祖其年先生

少受知於婁東有鳳凰之目金生平服膺迦陵

著作不憚手胼口沫恨生也晚不及遊先生之

門茲得瓣香中丞竊藉私淑何幸如之八月旣

望中丞奉命入關金情不自已持筆札於保

公相園池慶宜樓下詩將成揮淚如雨是夕往

質中丞就秋燈下拂紙長哦相嗚咽久之蓋明日即登車中丞曰余爲萬里行爲得此三詩也

國朝蔚詞宗大家首迦陵元精留燭世再傳公代興節鉞
半天下猶嫌未長征位高違願達誠重覺勞輕要使西域
外風老成典型賤子胸何有萬古雪冰追蹤天山遊恍
惚皆舊經謝彼行役艱搖搖卽次情何意奉圭璋龍門茲
廼登

龍門攝全河祖脈連崑崙胸中鬱衆奇道氣賒空尊皦日
鮮遺照深知無淺言謬叨國士許常懷丈人真古人重知
已什伯於感恩鶡鳴且廼警鴻來後爲賓文翰亦云末微
躬日方循來者益滋懼跼勉終令聞惟恐傷公明永負中

心仁

中心不可已明明燈燭輝識駸以片語豈在常登階清風
昨戒塗聞

命臨當歸甲兵范老子三樂榮啟期明知造化心不爲一
人私何妨送公早所恨識公遲知我天海外又不果終依
丈夫恩愛淚老更不輕揮爲公落難收失路如嬰兒

送楊觀察

廷奉

命南歸

柳州人

玉以抵鵲賤雪到嶷山甜論詩如取人柔熟性所嫌君子
遠謫居柳陰閼幽潛曠然都已遺筆墨廼不廉六年拄老
屋吟苦神方恬

詔下盎春温被體初陽暹歸心似芳草綠過天山尖北門

出走送馬首余當瞻

豪氣吞百川空天拓澎海生平萬里心卷之畫圖在摧輪
朱不駐櫛髮元盡改炯然虛室白塵沙那能免憶曾驚飛
搏見囿造化宰幻影失前遊逝機積新悔江海渺東南西
北天山待手握造化奇古人難兼買

十年官粵中罷官除假面罔知仕途紆但覺人意善柳侯
留空祠杯水清可薦魚以孤立危鳥非秋風變主我黃竹
街君家竹林彥方忝巨室慕憑虛故園繕吟情杳難攀宦
轍久已先豈意天西來落魄許同傳

立魚峰秋風鳥
柳州事見前

我來輒送客送客盡三年畏友如奇書香色敦古歡詩情
似秋水淘洗白石根希聲洞庭夜葉脫空江船苦詣卻泛

愛潰圍留孤軍獨我揖臨歧須臾亦奇緣途長暮春陰貧
別生晝寒從此遂天涯去去夫何言

冬

送歸映藜方伯奉命東旋六首

若木枝干雲蟠根閩東榮造物鍊使堅冰霜湛精誠懺彼
當春心澹忘於邊庭緬茲塞程極來軫無再征積靈盼方
融韶令倏已更念念在許

國暄凄詎移情十年力撐抵鬢改素不盈何意侍鄉望追
歡如平生

河嶽氣代鍾後先厠

天閭凌風起矯翼直上儀雛凰

畿輔來暮歌民俗偕吉康監司最古冀旋進藩東陽

御屏誌累勞會當畀封疆歛爾萬里行仰逐孤鴻翔
天恩深未報心非限關隍惟有長庚星耿耿伴明光

故家虞山下舊爲文物邦采藻薦游祠道南循所宗前徽
金閨彥章甫飭禮容炙手不近爨酬遇非熱中論仁鄙三
仕餘味留淵冲至今凜家法面日照清江達人守不辱君

子規有終豈真此閒樂曠懷用持躬

謂令祖殿元允肅

三千六百日孰與宮商諧風霜澹西城黃花挺寒枝豈翳
耽玩物漫與陶情爲益益延生意太古渾在茲種如松柏
承冬心不能衰寡言耐久要正色締終依有如入關人次
第催全開馨香沿山去許我攜之回

賤子亦何有猥許生江南古簡豈春桑恣啖如飢蠶扁舟
溯湘水官舍僧棲菴十載冰兢心惟湘對清瀼捧檄事戎
馬嶺嶠蹶征驂倦申勞者歌喜洽吳趨譚垂涎數鄉味際
此春逾三甯惟釘櫻笋奇癢搔老饒

蕙筵告元吉

恩綸三載前臣心老戀

闕未遂歸東山峩峩金門奕奕神芝顏靈光矗舊殿甲
第高新廛所幸尾脩塗尋蹤亦搖鞭繫馬勢欲騁繫鳥意
先搏臨歧語珍重風雨矢勿愆往來桃花岸五湖須買船

經遺堂全集卷之八

五言律

江都韋佩金西山

春詞二首

大地繁華劫江南況不同多情是芳草無那又春風橫笛
三吹後長隄一送中迢迢隨去馬容易夕陽紅
未破繁華劫春情豔豔同偏成垂手態乍斂滿衣風江月
隨潮上湖船機畫中橫橋渺烟水不接小樓紅

同高綺塘練塘兄弟四橋泛月

今夕夫何夕茫茫泛此身空明湖上望三兩月中人露洗
家山骨天開畫本真黑頭非冷僻棲泊出風塵
憶從太白死此樂竟無傳趁好湖山窟重來不記年長洪

孤月瀉佳客列星懸惜少黃樓客凭高望我船
載和敲舷唱虛摩盪漿肩櫓聲輕走樹湖影倒浮天取醉
船添重工吟景欲延我心在空水夜夜此澄鮮

贈卞振

過訪當炊後無烟上屋茆詩書塵一榻兒女燕同巢窮瞎
幾張籍凄寒過孟郊斯人好奇計忍聽老居鄴
君眼大如箕君心細若絲捫天判觸膜酌海稍盈匙橋北
難移性松高不改伎賃春有清德但許伯通知
看花志不就且復待花深蠟屐阮遙集清言支道林前程
鶯出谷今雨鶴鳴陰何必城南會方堅金石心

同徐

見季深劉長

三秀才瓜洲度月信宿京口

晚貫橋邊酒宵汾郭外灘荒村人語斷空月櫓聲寒燈影
隨潮去鐘鳴急夜闌金焦山色好留待詰朝看
喧語舟人起深衣客路單孤篷霜氣重一夜海潮寬意氣
爭看劍澄清獨倚闌真成數晨夕須信素心難

早春由功德山步至小香雪歸憩臨水廢園

青山我舊識經歲復經過冰雪前身在梅花氣味多春情
先著水陂淥未生莎忘載一瓢酒初肥奈月何
偶出遊何薄重來興迺賒雨深四橋水春汎滿川花選勝
分山徑臨流卜我家雲山非不衆片壤遞清華

河橋

河橋望楊柳嫋嫋春風生山水皆師友鶯花各性情爲譚

舊遊事同憶晚秋清幾日迴征雁尋芳約又成
芳時殊可惜尋賞愜清嚴暖籟分風出香光欲雨潛人和
春嶂遠愁與晚潮添看盡遊蜂過當花各自廉

清明坐雨

二月愁如水而兼春病生新巢眠燕子宿雨洗清明紅重
花低戶青多草上城濛濛大隄外未許馬蹄輕

侍袁夢堂先生會諸同人四橋春泛

大地橫烟景同堂賞最新分明一湖水畫出十分春夾路
開花葢相逢儼故人緣源隨意遠無待問前津
招提快遊覽春夢醒於禪樹老還支石苔深別有天閒雲
望如此危閣坐飄然冷絕蓮花井繩痕又幾穿

素舸識人意容與赴遠亭酒傾春澗碧眼對暮山青嘉木
欵餘靄雜芳吹遠馨高踪幸陪賞緣思及蒼冥
行樂翁稱醉從遊弟子班將來敬草木此會壽湖山密綠
先成暮歸流平最閒老懷契風浴高咏一開顏

汜水道中

河氣兼湖湧冰天不肯春晴推篷頂雪寒襲鳥邊人日澹
新年靜村稀比屋貧廟牆紅一角私祭定何神

泗水橋

觀海難爲水知津莫問沮同洙弟子列近魯聖人居楷樹
心喪後蒼生幽贊初漫濡題柱筆還讀素王書

白溝河

姑息唐中葉降蕃河北尊如何承五代仍此割中原遼海
沈天遠關雲接地昏竟稽山後討留豐與孱孫

鴻溝此溝水邊氣馬蕭蕭樹密天疑雨沙驚日射潮使來
東道亟師下太原騎何必高梁困還愁犯瓦橋

競驚軍行捷將如廟算何老貽良將玷敗坐喜功多奮銳
馳羅口窮追拒馬河徒涎杓窠印不次賞休哥

媪相真兒戲乘危倉卒間謀疎奔涿水計左襲燕山夾道
黃旗出將軍白挺還自捐師十萬不再復三關

脣亡果寒齒骨立久銷膏臣妾卑同夏流離慘繼遼山河
爭一寸和議不崇朝參肉甯堪食艱哉明盛朝

送王雨樓^林之官浙江時余計偕京師

三月聯牀夢夢中尋路還驚殘九門柝同話五湖山行子
將春去羈人滿座閒輸君搔黑鬢緩棹出江關

官况同湖水清清不肯深相思杳南浦幽意用西泠漉酒
尋泉眼焚香禮塲陰輸君印牀上坐盞萬山簪

親老如春暮思親忍餞春還憑衣上綫遠繫客中身曉市
聊添價茶菴屢送人輸君便歸省櫻筍味方新

京師寄袁夢堂先生

眼底才如水爭朝大雅宗嵇康慚比鳳老子歎猶龍鼠案
翻陳酒花牀動冥鐘

江都城南寺鐘曰幽冥

難忘冰雪裏青出瓦墻

松

乞米帖在几運租船到門千秋勉維義一飯豈忘恩覩縷

謀婚塋零星憶話言吹來風五兩感極屏華軒

寄里中同學諸子

爲珍故人淚不浣別時衣戀賞方舟遠傷神獨燕飛依依
臨水送黯黯並春歸一鼓伯牙操海天知者希

舊宅紆門巷天涯憶不禁暖須窗紙薄晴奈井闌深東市
燈量酒西鄰樹集禽老親煩問訊消息抵兼金

重經東阿

瀉鹵晴多渴清泉漉漉甘三齊聊攝近四履穆陵南漕轉
河無定天青嶽與參依稀來日路風雪閉孤菴

陽穀卽事

朗日消寒沍中天不肯斜女牆整層薛兒燕重孤花小驛
關山酒清風父老家漫嫌人事樸布菽好生涯

同綺塘練塘兄弟泊舟仙女廟

滿負大瓢酒同辭書客家歧塗多白眼一醉看黃花渡口
夕陽外廟門秋水涯浮生昧棲泊只合繫孤槎

薄暮東臯望人家稻蟹鄉耕漁各圖畫吳楚接青蒼百道
爭淮水孤篷下早霜煮鹽甲財賦全重海陵倉

我輩飛騰意宵中更鬱沈急觴三尺劍殘燭五更心雨腳
兼天重秋魂接地陰憑看好奇癖兄弟與年深

東臺道中

官鹽煙起處鬱勃海門青財賦空關子舟航急漕丁荻乾
防著雨魚賤易聞鯉遍覽民依重歌陳當路聽

泰山墩

泰州西門內宋岳武穆遺蹟

宋室山河改精忠土一墩江湖吞未沒嵩華氣同尊亭敞
風波恨星捫刺字痕海舟覆龍子不到此依根

寄嵇七惠塘

春和在泰州

造物鍾元氣初春叔夜家素心宜白月同命有梅花我每
成新什歌爭汲井華依依近遊路容易到三義

潑空放銀漢古硯漲餘波助爾青雲思傾將綠水河

郡東北

牖下為綠水河登樓千里近酌海一杯多

君寓州城翼隅望海樓

應憶劉公

幹劉三午堂開門久抱痾

京師寄練塘

君家住西郭背郭敞精廬石路沿秋草城河集晚漁露蟬

鳴柳斷霜蟹穴沙虛水墨方洵遠

士庶儀徵學生善作畫

楓根繪讀

書

讀罷無歸處高天意氣稠星沈萬戶夜燈暝一街秋水調
出明月雨聲聽小樓黏天望江漢不肯到門柔

廿年共休戚三世密親知水石秋同病鶯花晝下帷代供
遊子職全慰老親悲何必東坡弟彭城愴夢思

黃大仲則景仁移居

當代黃山谷京華幾歲華又攜家八口改卜路三義碧颺
頻移竹香分乞種花卑枝非久踏况有未棲鴉

長安雖米貴將母得歡顏巷短敲砧急人稀臥犬聞翻車
收苦水倚屋借西山魚筍冬冰裏天教賦雪慳

負薪人子職石炭代薪稽鄰梵鐘鳴寺詩燈葉打齋趁墟
今小市夢月舊斜街賤食官園菜方知此住佳
久別南陽宅還遷廣武廬生平幾兩屐漂泊一牀書樂介
新春酒清封未仕魚莫同司馬渴老借茂陵居

京師寄呈袁夢堂先生

爐火同宵冷重帘折竹聲瓦牆松漏月板屋雨支更河水
低官牖鐘苔繡古城吟餘煨芋栗既飽踏街行
上日尋佳賞春衣着柳綿草連湖一碧人與燕同船藤本
敲茶鼓花枝質酒錢先生曾幾醉手種滿堂前
一別今周序唐花客邸催身家難兩得心燭肯俱灰米貴
居猶易楓青夢不來深恩似江水雖遠日灤洄

題楊九兵曹半舫

平原趙公子廣廈闢千間地與春風轉天留粉署閒疎花
三徑雨小幅一房山欲作虛舟艤清溪第幾灣

遣心不似杜凭檻得川江畫稿摹家水漁童睡客窗舷鋪
青石級篷敞綠油幢隨地成高尚名心及早降
小舫能容幾還教署別衙吳淞秋剪水烟雨曉裁帆碇岸
蘆供借堂坳芥發凡須防打槳溼多少濺朝衫

兩年人海住萍挂海中緣踪跡因風柁功名上水船閒鷗
沿月外歸燕及花前

是年復主
兵曹家

未敢攀同濟龍門尺五天

自京師抵家卽事

久陰愛冬日笑語暖荒扉掬水塵埃重詢人親故稀壺觴

新臘釀針綫舊遊衣經歲門閭望書來早說歸

親心慰登第謀養及閒居徙樹淘枯井傾箱理舊書家貧

遲嫁娶志左畏鄉閭白首敷先德頻聞上冢餘

遊釣尋蹤改身家作計空心於多悔病詩到肯刪工竈冷

留簷雪牆低掃地風幾年夢超俗難比脫龜筒

展轉風雲思消除兒女情家風水澹泊心地燭光明已屆

中年近何曾一事成循躬逮明發浹汗愧虛名

張丈漁山老工詩貧甚幾不可活時來就余食

雅有此贈

生平杜工部死要語驚人大海得真路仙舟無四鄰苦將

吟就酒坐且杖兼身莫歎余生晚差教接後塵

面色如梨凍將母盟井華生兒假枯木丈一子西知已古

梅花丈少作梅花詩百首傳誦疊紙囊全棄捻書價又賒

清心愛掃地合過左司家

飢來不可住驅使出蓬蒿雨地量苔屐花時擁緼袍傳應

同佛格豕欲稱清高我忝陪拈韻今年亦二毛

八月九日同王二丹谷嘉吳二心齋振四橋泛月

誰題泉第五原未讓中冷石上藤蘿月江南桑苧心小船

同葉摘清話與湖深得句都嫌俗除聽空外音

椽燭搖秋氣偏於翦處涼有花卽佳節無閨是重陽水木

分風力歡呼斂酒狂何如望海上戢影坐書堂

寂寂長湖夜諸天杳廓間不秋非好月吾郡欠青山赤岸

江心寺藍田水面關還須同放眼牽帥遂幽攀

過邵伯埭

二十年前事青衫此舊遊花飛大隄雨人上望湖樓絲竹

家風在旃檀佛性留

謝從母遺孤名嘉旃字檀西

蕭條滴水畔誰問鄭

瓜州

趁晴方進艇晚色起前途短笛曳黃犢寒潮平綠蕪人家

烟樹密魂氣水天孤恰好停橈便言尋舊酒鑪

作客身將老酬恩事不成風烟白鶴觀遊釣綠楊城舊雨

重門閉新霜兩鬢生櫻桃知已熟一樹最關情

京師半截衚衕弔黃仲則故居

春泥葬詩句井水送歌塵居易無前輩文通本恨人鄰鐘

十年斷榻帖幾回新記得移家夜零沽酒最醇

一別京華去魂歸客路陰棗花連雨夢宿草過江心好鍛

門依柳揮耒地有金車停非葬所捧腹慟難禁

出都兼旬明日是江南境

酒澹荒山色衣飄黃葉風小車尋斷路疲馬斃秋空疏鑿

江淮合登臨徐泗通宵行經大澤壓月水當中

六渡黃河水車箱鬢欲絲健饒為客味貧願到家遲湖月

初弦夜橋霜漸白時路塵纔碾盡已誤菊花期

蘄水夜發

落日辭西塞南風送夜程亂山孤棹疾初月半江清戰艦

名王撤營田學士耕篙師明日飯楊柳武昌城

湘江舟次

嶽足圍成郭江清借作壕恰緣山曲曲斜疊路高高纜繫

綠榕樹船排青竹篙

船頭留大孔每泊船以篙插孔深入水底眾船排連如陣

徑須相

就飲村酒蒸松毛

勾留不成去兩岸泊空船湘上攜家客山根一夜聽因成

相鶴記持換種魚經咫尺賒魂夢猿猱嶽樹青

際曉心全洗登高眼更明亭如歷下古水比鑑湖清掉艇

夫須笠登庖祖竹萌何須田二頃志迺定歸耕

留別蒼梧士民

士民送行詩有片言折獄堂成讞屢辦王差俸自捐又請聽間巷謳

歌者盡說韋公不要錢等句以多俚率不具錄

我本淮南民南來官嶺岑縣門洞中外江水直清深雨柝

巡城酒晨燈聽訟心孜孜抱贖背磨鼻舊書淫

昨送封王使今年王入朝禮筵煩屢設兵氣喜全銷金幣

冰融井樓船海上潮竹簾魚米市悉為免差徭

竟無論死獄圍繫欲空焉一尺階前地幾重頭上天稍宜

官拙訥或被賊傷憐伍伯閒賒飲枵楊枕晝眠

三年窮剩骨定不使人知官廩朝封鑰齋廚午斷炊舟輿

輕載速花鳥戀情遲苦賺應將去江風滿鬢絲

官代一首去懷集縣作

官代如僧退蒲團粥飯清三年開院久一擔打包輕白水

空盈鉢閒雲伴出城好搜方丈壁語錄最分明

謂手立讞案

水驛

人如苦竹卡瘦跡判鷓鴣雙謂諸親友水驛紆千里清風捷小
艘春辭大廟峽雨下廣甯瀧誰遣工詞賦年年利涉江

高要峽

不信蠻山骨江來日夜穿橫流東南海直上夾青天急雨
斜飛轉危猿欲接懸葉舟聲浩浩并力况風泉

梧江艤棹

送我一千里東風花與飛再來忘是客所至倘如歸江上
虛亭在城隅舊館非軍賓三載劇供億獨今稀

舟發梧江湖灘赴桂林

帆正辭斜渡城西日斜馬頭山長接斷雲別家孤影去如水兩江
分時以家累寄梧晴尚層灘響閒於不寐聞東西兼劇縣辛苦話

參軍

纜牽如矢直界破碧巘嶺山骨憑江鍊天心到峽寒飛鳥
千里棹墮葉六年官莫唱空舫雨偏愁蜀道難

陽朔

出險昭潭遠閒情靜路生有山皆畫本無水不湘清荔雨
歸遙市榕陰綠半城看囊憑采石可抵一錢輕

留別柳江士民

間閭真疾苦我愧不能陳奉水無非酒如兒戀此民一年
騎驛馬兩度現官身寄語方來者常留土俗醇

羊角

山名郡南十二里

分歧處依依欲別難我貧原到骨此去但
餘官長路天憐暑前山雨送寒口碑豈傳信緩付柳祠刊

凌雲衙齋歲晚言懷

掃地焚香趣家風掩卷知小窗方紙格陰室舊書帷躬儉
崇唐什歌清嗜楚辭但爭山力厚不在得春遲
接景無餘遁開門集眾幽深泉坐花洞疎樹見山樓石雨
響兼落松樵風遞收與人殊冷暖水味辨春秋
親民江上邑移檄此之邊瘠苦經三郡憂危逮十年辱無
驚吏考盭不贖囊錢差信為農拙耕深有寸田

桂林寓樓喜袁明府同年世過即送回岑溪任

似鑒居官拙來論上計文鷗閒全學我菊瘦不如君水閣
寒零雨江帆渺片雲離情與秋色眼底恰平分

古井無近水高梧仍昔陰袁回岑溪道出蒼梧常澄江底月如見故

人心我昨浮家過人情念舊深孤生恒不死藉可慰朋簪

零陵江上聞雁

歸雁尋來處天長路總殊嶽寒春翼輒湘雨夜行孤寄語
虛傳帛流哀想折蘆北征非寂寞關塞我相俱

湘江見月

乍霽看弦直孤光極浦生月從今夜白湘是古來清坐久
寒常忍宵深水不明都非人世語堪與質幽惇

衡陽舟次

自古佳山水多教遷客當道心鐘出嶽歸夢雨沈湘馬瘦
馱州牒篷低檢路糧初程紀年譜十日過衡陽

楚江見柳

與柳十年別楚江今眼開老同邊塞去青認故鄉來風態
江柔處春疎雨過纔無爲攀陌路竟忘隔章臺

漢水雨度

漢水不變酒蕭然春若秋清明連夜雨花柳一江愁鼓我
滄浪櫂何年西北流紛紛峭帆去七日下午揚州

發漢陽宿黃陂縣

送我漢東路東風吹散絲大瓢雲夢酒殘紙簡栖碑竹屋
魚蠻子江舟水馬兒前勲想韋虎一旅障南司

安陸縣西白兆山李白所棲碧山也

白也醒殘醉重來棲碧山桃花開雨過流水到人間月上
辭鄖國春深出楚關仙才署詩伯端在此心閒

發鄭州

北門當日管直指大河隄前驛看人去初程獨我西橫雲
山漠漠宿雨草萋萋一度舊京水因之信馬蹄

平番小憩翟二明府筠溪方衙齋臨行賦別

爲下陳蕃榻初程急馬蹄隴圍大河斷天入五涼低剩雪
寒山靜清霜萬木齊星星明驛火供頓古城西

玉尺量才會因之翰墨緣從君遊十日先我發雙旃客鬢
枯秋草醲懷重酒船關山蕭瑟意只有義公憐

神君十八載選格冠清班民瘼如兒切臣心似水閒防邊
塞蘆子弭盜伐松山欲問王喬術春風鏡裏顏

晨夕連旬數肴菹每飯加關湟商動定窮老對咨嗟借別

隴頭水思歸陌上花高情隨冷月一路照流沙

經遺堂全集卷之九

五言排律

江都韋佩金西山

荆山橋

三十六湖水七十二洞流津源隔東海形勢扼徐州半壁
邀中道諸山領上游晴疑芒碭雨春背太行秋幾驛馳青
竟巖城控魯鄒天教歷征戰地果足咽喉宰割傷前事經
營失老謀推尊一豎子牽制五諸侯努力遮秦鹿輕歸沐
楚猴望雲終在沛遺恨失吞劉郵范搨鄰欲當塗擁上頭
呼鷹赤帝裔縛虎白門樓設險輿圖悉成梁美政脩新橋
落虹影深谷徙龍湫石欲橫成陳山於鑿處愁鼓聲齊下
杙柱齒好維舟我不波臣競餘俱故道由長洪輕脫箭泗

水小踰溝千步平城角三年錮石邱汴渠交不溢河勢遠
能收自賣浮環後都無病涉憂堂閨民氣復梯級馬蹄柔
色土連墳壤邦畿未阻修篚筐織縞入田賦上中優
祭告山川奠綏豐禾黍稠潭深馴鬪虎地闢買耕牛鉅野
衛堪塞蒙山盜易搜文成清夢破徐偃去思留用此爲舟
楫經行速置郵闌干憑拍遍何處挂吳鉤

述遊七十韻

晚歲長塗杳閒遊覩記增邗溝孤雁語瓜步晚鐘應憶別
情如雨中清酒似澗輕嘗惠泉水低度錫山峻往事臚吳
越初封似杞鄩洞庭天遠近洮灞匯濟瀕圖霸甯非術窮
奢蓋可懲頻歸出柙虎終作背天鵬石室豐毛羽鳴夷謝

股肱五湖泛家宅百世寫縑繒遺像千金鑄滄波一葉凌
驛連平望久亭豈語兒憑蘆岸瀕居險桑田置產恒溝渠
相斷續沙石或侵陵越界看尤切吳山近可登同遊爲我
述八月候潮曾萬派來天馬千夫響射堦雲煙割東浙鐘
鼓振西興古佛金塗供功臣玉帶稱表忠孤觀失望闕一
樓凭有土終全獻援兵不敢徵陌花遺曲在淒怨踏歌勝
百姓爭私祭諸王斬廟初河西竇融入江左晉元騰生角
悲何日攀髯慟已升棄淮徙行在忘汴換觚稜殿月君王
笛樓船宰相燈鳳山空一脈龍氣鑿諸陵日到黃昏倦遊
於翼日仍郭門涼似水山徑直於繩野葬棺連屋鮮烹鳥
避罾園林推勝絕空翠極天凝插石林排筍纏衣草是芳

屏風諸嶺接杯水一湖澄篆石型家國琴臺享豆登遊人
跡寥落牧馬步凌兢墓道橫空額浮圖有舊層長隄老葑
卷中路晚烟曹山未遊靈隱詩惟誦駱丞西冷想松栢殘
雪照峻嶒路轉南屏寺禪參最上乘然疑運木井蕭瑟掩
房僧漸聽堂開板纔披月半絙還瞻禹遺廟欲媿舜諸馮
信美非吾土懷歸畏友朋朝來雙足繭輿小一肩承僻市
翻鴉陣荒祠過馬塍斷河初解纜急遞卸擔簦集感先飛
霰敲心碎打冰煙波三泖合雲夢一胸蒸落日拳孤鷺秋
風想季鷹鱸魚那可膾船戶頗懸簪十日圖難就并刀剪
未能餘霞收錯綺肥水濯層綾弔古須高眼懷賢最服膺
生還江水涸絕筆顧塘蕘嶺海危逾鍊忠清老更僱工讒
九泉螿煽燄滿朝蠅悟境華嚴熟真空玉壘崩戀深仁廟
眷報短嗣皇矜金水刑多難流傳道益宏何當伸氣噫免
我結胸癥呂堰斜青袵秦淮泛碧激全凋蔣山樹記摘後
湖漊苦酒圍衾飲高碑接腕膾秋衣飽風露宵茗破蒙甕
剩有飢驅杜而兼念母曾遂歸親戚喜重聚室家蒸與聽
鄰舟笛甯牽補屋藤殘年仍遠道塵土更堪憎

再赴計偕留別袁夢堂先生五十韻

舊雨追三載同人張一軍公車停道左別酒勸河濱斗野
排春帳珠湖黯夕曛空嘗旅食苦未染素衣纁返轍黃泥
滑浮舟碧浪沅經魚荒寺聽蔬筍野厨煮鐘飯羈王播詩
禪欠惠勤齊惟間季孟楚不庇江郎逆旅頻垂死餘生不

茹葦歸來敬桑梓入室走鼯鼯井塌多枯蘚窗開兩瘦貧
天方嘉未老力欲砥斯文汲古尋修綆羞人刺繡紋先生
老洙泗弟子遍河汾樹樹秋林桂年年泮水芹鯨鱗爭跋
浪鵬翅獨垂雲中散隨身鍛劉伶七尺墳蒼涼如一夢離
合與諸君橋水微如綫牆松綠似芸記於孤館宿殘夜一
燈薰吟苦家雞唱譚深巷犬唁讞難寬詰鼠賦屢奏誅蠹
德草何年結心香夙已焚舉賢又州縣招我以旌幘白蹇
輕長路黃河橫八垠沙虛齧僵柳霜重殺枯蕒斷磧憑投
宿寒山不可駮荒屯驚晚燒瘠土緩春耘野闊兜鷹眼風
高直馬筋川原方浩浩雨雪况雰雰每遇前人蹟貪徵往
事婪項爲讎宋偃毅豈入吳員易水干秦怒樓桑厭魏氛
終教豬腹破悔不豕牙獷井竈凋鄰樹知交老社粉雙親
年八十白髮苦紛紜遊子違晨夕家風有恪謹慈哺真愧
鳥鮮飽莫歌籟悵望人千里勾留月二分舊遊春跌宕出
郭曉氤氳衣霧連山起船香隔岸熏樓臺動白日烟水泛
紅裙驚景懷鄉劇觀光上計慙名都干氣象鉅制邁虞殷
列戟麾旌鉞圍橋振鼓鼗九門滿韋杜四譯禮姬妘虎觀
騰羣說鴻都懋古芬詞垣崇直講選格掌司勳左敢懸都
賦朱惟輯舊聞行藏珍重久祇是惜離羣

過大廟峽懷集廣甯二縣分界

一峽東西粵溪長力倍爭不隨羣匯急仍滿上流清竹苦
三义會柑橫兩日程

柑橫堡名

魚龍斗門夾星月綫天并矯鶴

難棲樹春雲亂入城花飛頻顧影山好不知名纜縱持危
繫厓傾兀獨擎苦心非石轉去思愜舟輕地隔瀧高下身
危吏送迎成勞空自惜改考莫相驚雨卻餘飛潤虹賒遠
飲明絡頭終豎骨鍛羽祇吞聲遠餞傷孫楚涼風感禰衡
浮生任前路底事急宵征

同邱衣千司馬

桂山

張禮棠參軍

震

長塘雨泊

天末偕行役江萍約宦踪橐裝輕越產鄉語狎吳儂憶理
平川檝同聽遠郭鐘觀方違白鶴神不禱青龍引酒憑澆
膽披襟迭動容上瀧方緩緩迎溜忽重重勢急離弦箭芒
寒出匣鋒猱牽升最直魚貫進非壅山骨何年鑿泥丸自
昔封平蠻絕險磧作鎮鎖邊衝草濕荒晨埃雲歸冷夕烽

武功碑版失靈派絡維鍾穩渡三連峽奇穿萬疊峰泊船
何處好聽雨不嫌濃列磴低聯屋臨厓密種松廟崇雙髻
佛墟散一犁農漁火遙明眼樵風迥盪曾篷張便晚食甌
溢出冬春悵少凌雲翻同爲蟄戶蟲隔扉呻蛋婦連榻倦
書傭豪舉殊劉毅閒情托顧雍指困希子敬賣賦學臨邛
擁簟涼生滑煎茶夜半醲寂寥樺燭短盤礴帶圍鬆曠感
盱舟楫高文緬鼎鐘歧塗應牛馬空谷睽猩禺歎逝趨東
海尋源溯大融桂林明日近面面峯芙蓉

由百色赴桂林江舟述懷

與人都竣役我獨畏離邊去住經三月身家重一船殘歡
依杖履佳餞緬山川岸樹迎灘急厓枝閣石懸雨餘江轉

熱纜直夢迴牽夕聞浮蘋氣晨明觸菡烟風花輕宦後水
鳥捷歸前惜往頻嫌影違心彊付緣篷嗔終日倚衣趨薄
晴湔舉網嘉魚白登柁側荔鮮津梁紆轉磨舟楫逝華年
野泊渾無渡奇峰欲到天登高持戒久陟此愴懷偏難制
嬰兒淚親門路六千

飯樂喜晤吳二映棠

本即事書贈

舊雨盟情幾新霜點鬢偏寸心賒乞養一檄促歸田從宦
行千日同舟逮十年模糊疑牘字轉徙澁囊錢臘盡書頻
畚春來袂又連岸山排几上尚水到門前豪素親張旭襟
期赴鄭虔孤雲貧士跡涼月酒人天杷子登柁早鱒魚出
網鮮家庖香入夢鄉味口流涎墟擔敦瓜苦山花糝木棉
蹉跎變時物悵望老風烟弱息交憐影佳兒已及肩何當
畢婚嫁且莫臥林泉在莒心千古遊梁賦一篇惟愁越裝
盡難買洞庭船

飯樂寓齋集雨觀漲因憶閭邑水源撫拾成詩俾

括地采風者得有考焉計六十韻

維夏詩哦雅迎秋帖倣唐闌風稍不雨化日豈恒暘周道
凝塵後殷雷動物剛霧看屯子石氛盡斂陽岡乍溼攤墟
地寓齋門外每
午日逢牛墟平飄鬪草場迴風飄燕尾卸馱歇驟綱野

嘯吹篝火粗官避驛牆嫌今挑菜滄喜昨放莪忙山坡畚
地黔楚

流民爭來種菽
謂之放春菽一夜衝簷溜濃陰滑石梁傾於蒙發並集

處坎盈將括地先雙寨飯樂水源出
唐興上寨窮源起濫觴曲能穿

磬響疾更瀉茅篁伐鼓層山動跳珠匹瀑長巖瓢虛石滌

陸瀨小山莊巖瓢陸瀨二村名唐興屬臥樹懸崖失漂花舊館荒踏梯

流活活山根墾田層平毡遠汪汪山外墳起曰毡棋罨痕仙石僧

衣搭寺枋水生無故吟淥外有微行細草沈同碧融泥漉

漸黃漲非遵枉渚淳卽是橫塘移具牀牀竈喧春戶戶糠

戍旗崩里埃村讀浸書堂東溼薪眯睫生賦笥毀裳羈棲

諳井社形勝緬牆隍郡治虛三版因山為城設南北二關郵程轉百

樟村名在鄰站南三十里鄰站水至此為馬嶺邊而東下何因窮濬滄一任阻關廂

導水從枹合二村名屬上央亭在郡北一經流泱上央見水

四十里花村雖沸檻又五里見於郡北二沙拗不通航

而泱沙拗村名在郡南六十里西甌嶺外經流出水源洞受青龍水入北關至集祥橋下受三台山水又半里澄碧澗與

殊砂泉水合流入焉出南關兩過蒙村水又三十里卅里

受西甌水為西甌嶺所遏伏流巖累坡底曰穿水巖

穿清濟又三十里出於鄰餘波會濁漳又八十里至飯樂

水二十里至川龍游蠓蜒龍川亭在郡東嶺馬怒騰驤津

逮何年遂支分更莫忘坐花深洞杳可月一池方殊砂泉出縣治

後山坐花洞下石簣平逾遠風潭淺亦盪泉源係一小疏

右為靜觀池根培側荔如畫抱垂楊泉溢為溪環縣治東入澄碧澗上

本絕汲靜陶芳藻樵歸帶夕陽還須尋磻戶不憚越山房

泉北一里卽澄碧澗之夾岸松籬落叢祠冷瓣香澗源出

源中隔府治凌雲山房下危亭繞亭沙石淨出穴水風涼列磴偏多隙淵泉聚一

甚荒冷望寒都澄似玉清更碧于湘絲網撈蝦密桃弓射鴨彊輕

宜編後渡低恐板橋妨澗水會殊砂泉水過板橋出玉皇廟南入經流試數探幽

遍非無物產良打包繇一稱斯斧木千章機絞紛焜綠刀
矛獵鹿麇飯包民憊役鹽裏僧妨商續竹乘危步搖鞭怯
斷疆渺無舟楫利空接水雲鄉愧我干微祿攜家徙瘴疆
放衙排筆陣判牘雜書倉野潤魚生釜庭陰鶴飼糧犢犁
彌暑怨雞酒禁宵禳土人病不延醫於水次雞酒禳鬼未底三年績憑垂
十載囊閒身一杯水清鏡滿頭霜廬墓仍迢遞知交各老
蒼懸車差養拙投牒更增惶客秋督臣吉班師各亭土庶紛紛投牒請留風俗
書應補輿圖表待詳非惟參稗記或藉采邊防苦潦愁消
夜祈晴便束裝蠻江打雙槳須勝雨帆張

臨關不寐因徵西涼事三十六韻

元狩開疆遠休屠隸字先五涼更俶擾一面較安便憶昔

稱神靈如將混玉璿屈臨真借耳丐命迺終焉洮隴窮兵
最河沙拓地偏西封難久肆右臂忽相牽孟敏官除代唐
瑤叛接聯兆占駒額白系出李根仙魚澤深圍障龍堆急
控茲二州請朝命六郡統雄邊部落纔爭附都官倏內遷
天倉金作粟塞水酒為泉顧託兼三府艱難不再傳奈於
蒙業始頻鼓憤兵前切諫宰臣盡危詞背母賢誘深藏勁
旅戰苦失迴鞭敗績窮求馬尋寃待牧犍疆場奢築觀禁
闕暫迎駟逮老依姻婭和親間愛憐義饒羈蹟定識鍊俗
情捐拓跋方全掃燉煌亦苟延一成存祀祏餘息足迍邇
略許循荒磧誰教近塞孺沮渠同轉徙闕麴賸紛纏郡縣
何年擴高昌老將平淪夷自天寶來復及唐宣釋地披圖

經遺堂集卷之九
盡交胸萬古填明當金峽過今擁玉山眠久客睡難著暗
燈挑不然警圓藤枕滑踏裏布衾穿夢以譏關破心於列
戍懸馬嘶將落月鉦斷欲明天行役九千里辭親第二年
廢材長不死磨跡旋將圓遠略包甌脫浮生務瓦全茫茫
青史在冰雪仰祁連

哈密五十韻

天出泉爲酒臨關滿餞行斗門踰塞水斤地接王程有障
堪遮虜搏沙不許鳴葫蘆長臥磧芻藁接圍營漢業中興
盛羌夷內附誠撫綏揮厚賞休養洽邊情屢請無都護荒
田未雜耕一從闢西域列傳附東京寶績重銘石班門再
請纓箭祈神傳毒魚忌水常清失衆由任尙窮追捷段彭

孤軍在方略三策折公卿坐棄難爲將虛糜亦害成分官
假司馬久計出屯兵典午羣雄逞番辰內釁生緬稽晉昌
叛直至麴王平尺寸聊延喘艱難互抗衡繫犍駒倒走隕
李蘖孤榮昏媾容犖獨逋逃納舅甥膺封小蠻觸竄死慘
颯毳保衆燉煌守攻瑕橫截城降人惟徇祿故土總難爭
自隸柔然後頻年戍主更烏孫合漢力羔子奉周正拓跋
纔升郡伊吾舊署名都緣東備亟未免外防輕貞觀增開
拓交河大合并雄州資扼控三縣屹崢嶸唐室中衰漸沙
陀異志萌吐蕃因齧噬此物最猙獰偷附初緣蟻長驅失
斬鯨北庭雖偶斷西極豈終傾首領心先格山河手獨擎
表文馳急遞拜舞率遺氓塞漠全圖獻疆場萬里盈到今

經遺堂全集卷之九
讀碑版曠代感忠精既錫中朝命難尋六谷盟孤危同戍
已牌印奪申師丁惟厚清述職游龍鉢雄謀夏德明十餘傳僭
竊八九郡縱橫苦峪煩球度前朝讐鼓鉦移民避俘掠改
築更紛縈欲補方輿記閒羅舊史評關山偏鬢影兒女自
春聲月令偕魚陟雲程與雁征問塗無大亥憶別數先庚
歧路誰將伯衰門鮮弟兄音書紆舊楚魂夢杳南荆詰屈
勞人唱流傳識者賡弛刑邀免役執卷老吳儉

經遺堂全集卷之十

七言

江都韋佩金酉山

孔家涵

昨夜長河露光白篷底何人臥吹笛煙輕波澄繚繞之破
睡江南越鄉客石橋流水到人家水閣逶迤隨一斜美人
獨立危石下不聽村女唱菱花

出東門

出東門出亦愁荒冢纍纍竟誰是同堂骨月分山邱人間
那有青蓑好美飯香包一家飽得魚沽酒樂且歌白首蘆
花不知老又是斜陽曬網天閒來漁婦對郎眠飄然棹入
煙波去三十六湖秋滿船

一水

划船捷於青竹箨一水受汶泗河淮綫隄西望賒津涯煙
雨迷漫波滴瀼巨鼇背空力劬勦空濛豎帆如插釵簪鼠
羅致盈鮪鮓夾隄髡柳間植槐高逾窮簷歲積柴以防沖
溢民魚蝸橫流扼石兼鎔錯似補天賴神女媧直四十里
循河厓石巨者隄碎者街歡然置酒述近懷塵封舊第不
可揩記城南訪香茅齋城河冷水秋平階我時把釣搜螺
廬蓼花亂落紅滿筵有人當風御文衺星稀河斜行坐皆
玉皇香案省舊儕天荒地老誓與偕搏沙放手後會乖渺
無終極不可諧衣穿短後黃襪投荒生啖虎豹豺嶮嶽
歷盡開煙霾天門雲裏青歲裏風飄仙樂無淫哇霓旌翠
羽仙仗排鑪煙下繞神芝萋羣仙朝帝聯駢駘離立無嫌
天所差笑謝人世遺形骸

渡江

浪頭馬奔突人立帆腳拖南忽飄北青山近與船俯仰雁
撇秋人自飛急我身徜徉天水間我心吹挂棲霞山驪龍
銜珠不肯吐黯然待我龍江關沙岸微茫煙樹活畫工不
到秋豪末倒翻石壁收日輪出入三兩漁樵人篙師仰面
無定風拽帆苦似彎彊弓浪婆風伯意爭飼無論陰怪饒
幽宮一家槩索不離手直到五更剪江口

秦淮雨霽晚過迴光寺

碧霄如水涼雨收我行出門尋野秋秋風吹衣好行路手

攀樹枝過橋去橋下不深流雨清竹根沙虛漱有聲推籬
倒地摘晚瓜兒童牽藤各認家家在城隅閉門早豆棚冷
冷飄一花深淺苔隨石紋細陰陰路入迴光寺卷舒白雲
投我懷洗剔秋山對僧睡道人出泉安水春未晚歸打荒
荒鐘重遊之約天應許明日還愁鷺峯雨

燕子磯

宋州真人泣白雁濠梁真人乳北燕飛來啄矢愁皇孫倉
根斲根金川門鴟鴞毀室宮中火采石橫江無一可掠水
誰牽隔岸絲將書銜斷沈江鎖楊榮李景隆春濃相傳飛緋
衣日下摩烏衣翻思築壘冰城夜健雛守巢不得下北平
謀畫全歸僧慚坐畱都久不能奉香左掖病宮監秋社添
泥埽孝陵南天野老吞聲慟缺月江山昏似夢兔脫空傳
地道疑烏啼未促宮車送墟里株連蔓野瓜悲騰鼙鼓起
塵沙出塞三軍榆木淚過江頃刻洛陽花磯畔當年濟師
路零毛斷羽摧殘處開門迎賊都中官放盡昌平鴿飛去

晉卞忠貞墓

妖星燄熾東陵口龍子真成下殿走一捧鼓聲殲六軍霹
靂連飛半空吼尙書力疾盱眙從瞻尙堂堂武鄉風君臣
然後有父子忠孝以外無英雄生前悃悞慳才思白刃洞
胸不轉背四維撐拄小朝廷吐盡神州陸沈氣廟堂無事
白面郎倒執手版愁當場名士勸進乞貸死齷齪馬糞憐
諸王並榻三公未聞語取節船頭愧蘇武不見青絲白馬

來蔗落當門庾開府墓南祠北隔江雲祠堂太傅宅相因

揚州南門內公祠

時來草木威朱序事遠樵蘇感卞彬邨

洛五陵無晉土一抔公墓仍典午門祚奇忠鬱莽蒼愍孫

筆落驚風雨

同里卞秀才焯公裔孫也善屬文

宿漁溝

曉發暮投宿有店枕漁溝誰信倦遊人伸衾不遑篝飢鼠
數錢房如冰欲滅不滅睡時燈荒雞初鳴夜方午欲斷不
斷夢中語戶左車鈴右馬嘶餘温在衾冷著衣霜華滿篷
月半地寒犬吠影隨鞭絲村兒擁絮睡正美明日日高還
未起

恩縣道中紀夢

煙春中人夢入山少非壯者饋我餐稍循禮數敬樽俎似
怪難為外人語忽然一夜春風生百花爭開花無名錦水
東流碧如玉仙人閒課花奴耕問余何處來時路余亦凌
煙學仙步紅香深深和綠醕石牀掃花臥花露仙人折花
左右戲醉挽長裾不得去扁舟沿水出桃源一劫須臾五
百年探懷却得如瓜棗攜奉高堂人壽考

恩縣

豪門寄食何足恩今人豔說平原君邯鄲急圍鄰不救或
感矯卻秦人軍夷門雪片大如手老肯捐生婦人酒亂楚
無論并李黃歸齊更是何雞狗後來引病藺上卿頗牧不
得終將兵屢朝老將替恩遇養士豈容諸父兄我生碌碌

成事苦十九人非一人伍不及同生像繡絲且可臨州酒
澆土

魚山

五官中郎將無恥虜人兒婦逐天子自知才不逮陳思作
賦緣情憑洛水出自轅轅辭舊京風飄白日心同驚耐人
懺悔惟文藻無可如何呼父兄積雪寥寥山疊疊經聲一
聲兩聲接孤磬欲發寒潭花雙林滿落春叢葉三馬同槽
豆煎釜碎齧江山歸典午築宮轉眼無宣房何況高臺教
歌舞古來覆轍尋驕王崇尙輔導多非臧西方聖人爲禍
始藩邸進身文其狂國中但有爲善樂山南不見東平蒼
自渡河登車絕不飲酒憶里中同豪劉三午塘鑄思

長路漠然率有此寄

熊熊星光柳上頭化爲百千董糟邱酒泉到處瀉珠玉何
必天津橋上樓小兒食牛氣吞豹筆補造化所不造古人
曾願死揚州萬金難買人年少倒意傾情祇爲君舉觴白
眼望青雲斷板城河流的的瓦墻松月漏紛紛君醉不聞
統如鼓我醉橫眠枕君股曹騰出埽千人軍錦幟奪歸日
未午嘗醉中應
試得雋却緣酒渴愛經過雙鬟藏釵臉迴波典釵
沾酒澆我醉臥君門前高唱歌綠楊露重鶯啼滑欲爛花
光曉爭發湖船撥棹店開門吳姬當鑪若無骨傾囊浪擲
青銅錢據案狂呼帽齊脫坐我大戶脫復辭一手提壺亂
澆髮秋來我獨遊金陵索居如病味如僧妙舞當杯我不

飲夢魂渡江君不能今春計吏偕京洛扁舟無情湖漠漠
且攜斗酒餞城東錯認當時恣歡謔我渡黃河賃短車君
更倉黃辭故家駱駝嶺低燕毀巢石馬橋寒江走沙客路
三千尙可縮酒債尋常行可賒酒人豪橫風雨散落花流
水天之涯屬君好守懸河口我亦不遠牛馬走井華水與
滄溟通但到君前盡爲酒

飲馬行

萬馬怒勒香河屯意似欲隘燕南原有挾函關土囊口來
此飄忽爲風門我馬毛焦足還鼻麥田春荒澤乾源那有
江南碧溪水清涼直到蘋苔根紅橋白石好牽洗夕陽破
碎隨騰奔出水爬搔就草齧綠楊兩岸淋啼痕圉人脫衣
手扶笠但看神駿閒評論識者選材耳批竹韓幹畫傳以
畫肉山中不少高梧陰誰與淹畱膳茶粥

塵中

無言自瘦如瞿曇喜眠不食如僵蠶積如老牛鞭不動苦
如堇茶味不甘眼前燕子笑倦客新聲逐暖飛江南故鄉
故人幾日醉酒杯深似西城潭柳絲贈別不贈歸那得把
瓊攜黃柑風信半已過廿四勝遊遠莫等重三世人道我
中結習孤春消息車箱參饒將綺語懺都盡彌勒豈遽邀
同龕情言得使耳目換智者創物非遊譚塵中執熱那可
住結茆但有焦山庵

先鋒坡

燕南趙北古戰場先鋒十日先裹糧曠騎風雨不可當蔽
雲獵陣驕天狼戈撻刃揮斷其吭首離不懲行倭倭奮擊
銳於哥舒槍骷髏歿視久怒張慟深不忘塞故創自漢兵
禍寵與康鮮卑終始龍城王隋季老將制洛漳唐之安史
起范陽節度盧龍最恭光棄十六州始石郎宋將著者三
關楊媪相十萬委殺傷毋迺此坡填國殤鬼馬錯莫用谷
量赤血流澗爲河江孤注無繼慘相望全軍凶門自開張
夷其手足身得疆廟謨簡帥須元良嗚乎廟謨簡帥須元
良

京師送王縣尉

彦之官浙江

鄉貢郎踏波淺雙槳南塘打波軟與君醉指樓上頭繁花
笑煙當窗滿扶風豪士青驄騎日下論心影在地天橋酒
樓解金龜莫使京塵壓霞氣送君踏草燕南關帶將衆綠
湖上山憑辭科第却叨祿喜得湖山不在官來日同舟逆
風吹吹君早歸日遲遲把手莫忘青門餞相攜會有滄洲
期一鳥先飛一林動暮雲未抵鄉心重鯨魚壓市柳條長
細雨家人歸上冢

城南行

春花亂飛春草綠燕子不歸空梁宿當時全盛晉卿家作
記較雅西園集移鷓換蟀今如夢白髮游魂招不入朱草
坡前暮蝶黃皂角河頭夜螢黑猶記梳鬢青青溼急走撩
衣不知屐五更踏雨叩城門美人如花煙霧隔萬事無難

取梨栗一生常對春顏色倘來世故啼笑難所遇何者非
疏逃眼前不見少時侶美食華堂足悽惻況我老大無一
成却憶恩門悵疇昔此情沈沈竟終極東隅已失難再得

州橋月

大橋做遙夜海風吹遠天月色欲墮水萬象沈白煙誰家
背燈理秦箏欲彈不彈聽月聲解夢不離砧上語將書無
那雁邊情大業天子清夜遊錦帆悵望海東頭孤光咫尺
不照輦至今苦戀人煙稠却愁踏碎橋下影煙波微茫杳
難求高處不寒浮我去底須更近尋滄洲

東臺返棹言懷

今年泥醉蘭陵春店香吹風柳花暖東來醉月挂雲帆淥
水秋乾蘆花淺津頭笑語尊孤館夢燈搖簾荒苔短高天
碧海空復空奇氣青霞雨中斷炊沙作糜那可餐製荷爲
衣那不寒故園絡緯當宵警輓轡無聲斷秋綆竹露微光
出簷影照見生魚舊茶井京洛觀光辭國賓遊仙煙客失
相親奪我好夜青溪宿驅向高門坐梁肉

初春信宿高旻寺

面江樓浮於舟幾日春嫩於人遠蓬蓬疎羅羅生意動閒
意多巡檐繞樹無花看閉門漁樵不是伴呼醒齋堂睡道
人且可同喫鐘時飯

江上花寄里中諸子

江上花因風飄轉得還家隄上草歸塗一路青青好不歸

飯僧廚閒與化人居如何古花木不到禪房疎或恐花氣
濃熏佛畱我當春作花骨此時載酒五湖船此夜搖情半
江月月光無賴揚州多多亦二分人奈何春湖十日九風
雨況饒簫鼓衝煙波揚州城下帆如駛別詩清過山堂水
格張寒孟下筆親幾夜勤買拋青春墻頭花亭亭開到天
之涯訪花主人獨不見開我閣門久歎嗟閣簾深深樺燭
短雙鬟插花笑捧碗酒籌都是好花枝相逢暢好同情款
風起齋鐘恰過花夢中有路教驚斷聞鐘起剔佛前燈懶
殘煨芋熟未曾橫江底事出門笑此意難語空山僧

再遊常州畱別綺塘

君不見相如家居四壁空囊琴作客之臨邛又不見王郎
酒酣劍斫地浪跋滄溟出奇氣卽今行李秋蕭條河長水
大船身高我行憶君煮秋水苦茗獨酌盆蘭死君歸有時
坐我家豆棚屋角垂垂花鄰女晚嫁弄膏沐老婦縫裳幼
子哭少壯過眼如流星我髮不與山常青往來刺篙力挾
柁踏穩何如理篷坐風波滿地託死生執手惘惘相吞聲
離魂如煙雨如絮望君單衣入城去

京口道中

山木怒吼蒲牢鐘四千里冒洪濤風石根漂流塔亂走危
鈴自語清蒼中登樓北顧曾蕭公丹徒寄奴無故宮夜火
橫江走阿瞞鐵鎖沉江愁阿童鞭石秦皇叱海若獻寶穆
后朝河宗車輪未薪牛汗血各與人世爭奇功江山無言

閱興廢雲煙轉眼皆清空江光橫展吞白虹陰晴萬狀蟠
心胸瀑流如鼓注石竇其下疑與天門通更千萬里一葉
過亂篙擺宕青芙蓉便飲白酒牛炙死此水也勝鄉里狎
五窮道路任呼作牛馬意氣我欲驅虬龍舉頭彎月張彊
弓舉手射蛟天水紅偃弓月斜浮死骨靈磯鐵色江濛濛

常州晤戴二雨峯

潤

卽送歸儀真

君歸記湖瓜蔓水向我床頭呼病起釣竿君又拂雲溪笑
烹尺半滄溟鯉黃紬被底君異鄉養疴我閉青苔房難忘
江外舊精舍晚花黯似心茫茫春社分飛草堂燕秋原同
作蘆花雁浮萍接葉露成珠更被江風冷吹散猶記大雪
遭大火我夢驚翻白沙岸

甲午臘盡宿雨
峯河亭夜火

殘年苦戀隔江

山雪後推窗借青看回頭三五月如人半村花好城

君由
郡城

之半村
遷儀真

遮斷有田不歸坐頑骨舍業依人真風漢送君還

家聽君歌君船搖過伊婁河顏似楓青經霜老句如蓼紅

臨水多

君蓼花
詞最佳

歸偕主婦承歡重雙鬟量水羹湯送燈火

宵寒不下機香花曉爇常聞誦起居若母母最慈當年曾
辱呼爲兒三載何曾成一事道我單衫住蕭寺我亦倚門

雙老親愁風愁水渺江津誰憐半老飄零客猶是懷中啼

笑身

雨峯過之明日命棹西城再送

石橋之水清見底君坐春船淘秋水蘆花白首天一涯我
輩交情亦如此船驚老漁魚跌脣老僕扶船君揖僧卷衣

放手君且去高天白地涼於冰詰朝往理西窗話無處更
借官人馬女墻亂草吹青黃漠漠秋心墮城瓦參差葉脫
隨流波日輪半落龜城河我來一竿釣詩卷病軀倍覺西
風多頗憶追歡及春仲興酣無那諸君何遠吸長江四千
里和月噴入金叵羅一揮十萬八千字神龍淚雨傾滂沱
餘生贅世髮枯禿死灰復熱蓬生科古人努力亦長往舊
事風雨同消磨此行舟子亦自失竹篙亂點青苔渦再來
何地重相遇野渡荒荒信船去黃花魂裊秋人衣西倉橋
下依稀路

清涼寺雜述

剪江入口由鯽灣行三百里無一山水清我與鷺照顏寺
古我同僧閉關頗聞今年稻花美更引城河一鋤水黃雲
九月棲滿田清香飽人風入川短衣叉手日長往看僧打
稻收豐年積歲勤勞纔足食便教雨粟需人拾我不願梯
雲摘瑤光手擒紫衣童子煮食香亦不願作令乞勾漏飽
采丹砂延上壽但願家產一莖日實五升米井華之源通
海底

清涼寺感亡僧

鱗魚出網春江白絕愛銀鱗手親擘船重酒翻夜添客鯉
在春衣浣不得解衣濯足傾金罍露華沁髮簪花回曉寺
閉門敲未開嫣然隔墻橫相猜僧撚一枝笑踏苔交光燕
子銜紅來花容怒張前後臺書牀臥高衆香堆好春如海

清無埃我歸揚州牛馬哈病餘重過雙鬢摧幾日一僧已
蒿萊寺花彊半僧手栽那堪葉葉秋風裁與蝶無聊空繞
樹緩趁僧雛莫僧去澆酒春船網魚處野花開上新封墓

雲溪之水歌荅屠進士

珂見寄

雲溪之水玉雪清同君清發人中英我客溪頭高軒過有
如此水堅心盟茶香靜煮一甌雨譚鋒欲割層山青長江
北渡三月暮君亦襪被辭龜城來乘敝車過短巷入踏碎
草行空庭我時臥病氣纔復曉禾珠露騰根莖是夜畱君
宿小閣夢同泛舟溪水生雲溪之水秋泠泠漂花漸與書
牀平我從君硯求餘波君爲我按紅樓笙得聚如萍別如
雨桃潭千尺難勝情新詩節諧鸞鳳鳴歌來競出魚龍聽
涪翁心匠裕之骨西江往往闌幽并有才如水沾丐我轉
慚虛負能詩聲何當溪水變醇酒醉吐雲煙爲子賡

喜晤儲雨琴卽送歸宜興

畫山先生世講

黃河走海源火敦衆山參天起崑崙離奇大木不世出當
年雷雨蟠其根天教脈望沈書海遠艤成連一舟在摩抄
銅狄魏靈光及見彭宣鬢毛改嗟予不第辭春明津亭吏
鼓催歸聲秋花冷落長河雨萬竈煙沈斷鴻語春花暄妍
彌勒龕江北燕子飛江南病魔屢壓拏雲手典衣再貰蘭
陵酒酒旗挂在太平興國之寺前寺僧醉我同放蒲鞵船
船放東門掉入陸家之簡園我逢公子方少年剪燭通宵
六年話佳會可知明日罷折柳千條不斷絲送人千里不

斷思一丸換骨焦穀穎不偕君去將安之大笑吾師見顏
色詩魂原未蛟龍得

病起持齋洪大疏谷規以詩又答一章

君歌且休意轉警慮我心於病餘冷煨鑪煮酒勸急觴碧
玉春瀾沸枯井樹芻祀軼軼有神剪紙招魂魄在門貪饒
迺爾到蔬筍指擢何以為肝腎窮居得有意氣存尙不使
低肯使盡自聞神語飄虛空泰山籙與天心通顓頊生兒
敢爲厲手擒擲之江水中君知衣食非真供驅使伶阮作
兒弄前人多事岐亭詩絕倒踏破黃齏甕

昔夜坐月靜雪館分得人皆苦爽四字詩俱不成

寓高旻寺補作人字韻東疏谷練塘

雨意結轆連五旬浩歌在腹忍莫伸喜晴坐月院如水竹
柏清影涵溪蘋遣此良夜那忍睡眼前所少惟閒人承天
寺遊應讓我當時止一張懷民露涼惆悵不更歸黃雞催
曉傷人神世故繞我如轆轤生死供人爲勞薪我心一片
埽後地屐跡偶過嫌成塵城南富兒何好事愛慕禮數招
邀頻相看何必有錯忤但覺格格多艱辛頓忘家需活升
斗高眼怕見粟滿困故山但有王與裴清與輞水同漣淪
寄詩幸勿出質世不敢識字防人嗔

高馬篇

高馬愛面魚愛鱗離人出帆江送人一壺細酌君所贈長
江變酒無此醇青松老將別後顏紅葉落齊行處山千秋

笑語不吹斷豈識江風如此寒縫衣綫減帶多結帶斷續
繩繩亦絕我意由來在山水天意因之肯雨雪淺湖汨汨
舟與低寒槩三泖打九溪把書篷底燈上下更聲水驛兼
荒雞肅然古人坐在席夜長聽我嬰兒啼

江上雨

江上雨雨意已驚客雲滿猶未絲風捲落初急急雨挾江
淘江沙帆脚雨脚同東斜亂篙亂手各爭岸上流壞船吞
柁牙江上雨客思家思家不歸宿江火風聲淒淒夜如麻
別家記打開船鼓計程過江四十五船窗急雨休自悲明
日山行覓車苦

吳兒

吳兒木腸不解語來趨新鮮打魚鼓橋林落實天早霜楓
橋聞鐘夜方午兒家新買蕩湖船朝蕩湖煙暮湖雨願得
厚貲嫁陶朱那解茶經注陸羽陽烏洲居冬不還釣徒來
往煙波間揚子真爲北江水洞庭尙非西塞山金銀入墓
化爲麋鹿無臺相對閒病軀指顧不稱意推篷暫泊漁
洋灣

登南屏山步蘇隄晚過淨慈寺

長松如毛石如筍振衣直上南山頂四山疊接爲屏風中
有全湖清耿耿下山稍西初俯湖長隄無人惟我娛我行
甫及蘇隄半湖冰未許方舟亂六橋指點殊匆匆北山不
與南屏通浮圖對峙日西落但見野鶻盤虛空山靈樓觀

嫌鱗次夕虛翻展雲嵐氣埽松何人遲未歸殷殷疎鐘動
初地林昏不見見湖光一片空明抱幽寺遊雖澹薄心頗
歡試尋顛僧空井闌湖山閱人如郵傳我緣得遂甯非天
長揖山林乞珍重歸舟夜夜西湖夢

南屏晚鐘

我遊南屏山鐘鳴猶未晚寺門空翠收獨鳥隨人轉一聲
初出齋堂樹蕭散隨風忽何處同鳴況有木魚清疑度餘
音隔溪去風迴鐘再鳴再鳴歸寺僧巖城回望四山合但
見一塔煙中燈

聽君歌贈冒華芳

聽君歌初歌動芳筵非絲亦非竹飄飄上青天自斟暖酒
籠輕喉乍聞四座客已柔一聲停拍更淒折餘音欲從何
處收亦知佳會促遲遲爲我畱聽君歌君歌有時止酒闌
人散燈不明等思淚落如鉛水

吳山下別王雨樓林彥

天南垂雲凍欲折天南山水無不雪誰何遊戲高寒中一
夜青山白雲闕山左抱江右面湖網緼結秀天之餘不知
何年鞭渡海壓天一朶飛來孤知君腰有修文斧山亦畱
劫待君補架屋無論近上方訪君我到吳山下江魚少味
酒無香雪水茶清半甌煮却言與我別金臺挈家五月過
江來臨平一路藕花開印床深雨生青苔復道君今有底
急凍稜如山刺舟入埽除遊踪湖山閉穿出冰花衣裳溼

經遺堂全集卷之十一
肩刀裹縛短褶胡不歸借君笠活鮒何處西江流貸粟悔
向監河侯夢屍得官賀劉發艱難賴有青山骨撐拄天壤
豈無情不怕人將鍊爲雪

經遺堂全集卷之十一

七言

舟中聞雞鳴

江都韋佩金西山

獨客難可夢雞鳴殊未已曠野時一聞涼月白如水長夜
沈沈息羣作星光參差閃林薄冬暖無凝霜如珠草頭落
一聲淒以清更有羣雞相和聲荒村嫠婦抱兒泣我獨展
轉江城更

疏谷娶婦却寄

獨羽辭人似健鶻晚歲赴壑如修蛇豈我未讀北山檄與
君久別南園花山深寺沉出鐘鼓江寒船閉虛煙霞遠從
擬涉成連海迴望不見洪厓家何當杜甫長倚柄便可張

騫歸繫槎鶴柴竹嶺快聽雨中冷五泉閒品茶松江蓴根
秋膾鱸富春草屨冬撈蝦柴門不妨飼雞犬桃源豈必皆
桑麻市藥舊肯慰我病村酒記更同誰賒萬牛不載老柏
去疥馬足感枯楊爬君方好合順堂上人於佳兒知婦佳
寄君備述游歷語但涉閨閣嫌浮夸

雨泊連江橋訪屠進士珂不值

霜颯颯彫江樹故人江行得舟趣雨濛濛連天陰故人衝
雨皆齊心訪君徑往北城北早信幽人無喧宅虛窗未掩
待歸雲林鳥能馴不欺客遙遙何處攀君轍年來情事何
從說君將適館海東頭我攬君祛不得發微風酒家吹半
旗畫船荷花剛欲稀弄荷紅橋艤將歸美人當窗壓羅衣
欲釣不釣拋一絲如月出沐新未肥自吐金波泛幽閨忽
聞春囀百花頂嬌鶯恰破行雲飛珊瑚鞭指紅樓井天上
人間未能省斷鴻無分逐雛凰土偶還教趁桃梗記拍銅
斗送淡公隨潮路與君家通說餅客歸草橋外閉門人老
菜花中

太史李梧陽先生與君家相望

明年競渡雲溪岸過江來同壓塲

看纜船髡柳發新條穿取鯉魚長尺半

公車再上畱別疏谷

憂患所以鍊骨力貧賤迺可見交情多君不驚世上榮向
我苦求身後名萬卷付一擲有如洪鐘撞巨筵心力銛五
兵有如偏師下堅城就陳出新天洗眼已出仍與前賢爭
古人亦懼後居上半夜齊赴腕下聽黃金最惜虛牝受苦

心要滿奚囊盛囊中百不自收拾生平但有沈子明我行
日夜向芳草一路看君年鬢青君歸合在幽多處候雁北
來書有聲

憶釣

我欲持竿釣海水珊瑚亂拂難一起我欲擘粒餌江鮮獨
往從之雨雪艱城河多魚集橋影我坐橋頭照清耿飽飯
嬉戲隨隣兒蝦蛭鱗薯了不知一竿欲起衆竿逐一兒得
魚羣兒目遠去大魚笑難求更堪沮洳聊同候一寸積之
可百尺不爭此坐足可惜

贈武陵龍

維祺
武陵人

皇帝四十有四年京師元宵好明月是時海內承平久武
功者定干戈畢大開石渠蒐掌故

詔下直省徵遺逸鴻都闢館多士興三閣崔嵬盛文物奎
壁文章府河洛圖書窟都向今人指上出昨年君罷拔萃
科文藝流傳日下多楷書端凝更捷敏黃庭洛神工揣摩
請道君書定何似聞聲食葉蠶在紙大不過蠶之尾細至
鷓鴣之睫蛾之子以此食力忘風塵未仕先教厲廉恥明
年好潑古硯波春風吹作蓬瀛水更莫掉頭懷故園而今
不要桃花源

與菊詩

塵海人情不向菊我夢宜秋菊天宿夢魂與花花骨清夢
魂還家花繞城看花城北誰家好花田耕穿不知老分畦

養花如養稻壓擔賣花如賣草幽人餐花不在飽美人簪
花只宜少自別三徑趨塵中南山無色東籬空款我高齋
海波寺陪我心孤花滿地開夕陽葉牂牂意似不欲因人
香沐涼雨華舉舉意似不肯向人語零霜白月森高枝何
以金屋華筵爲此花千古有正色片語却識朱遜之請從
雅鄭分真濫一雪前人傷秋憾長安市上水半甌杜門花
不如人澹

城北行

飛塵細糝城河水土墻夜落槐花子羈人面冷貼霜衾一
片秋心壓難起鯉魚風警厭披綿秋心吹挂紅橋船搖落
卽是春楊柳亦如人生曾少年年華旣邁音塵闕流照朱
顏二分月小樓酒破天茫茫夢裏青山亂如髮長安甲第
金張家新聲競吠騰官蛙高枝冰玉瑩徹骨獨有昌黎詩
裏花迺知飲吸原根性湖淥泉寒都可敬孤山孤絕人不
廬肯廬定與山同命疎星如雨雲如羅天樞不動憑斜河
萬籟無聲見千古物華人傑空蹉跎蹉跎欲往忘南北張
眼城頭鼓加急須知長夜有闌時手把馨香曉孤立

題黃仲則

景仁

江上愁心圖

坡公七言最神妙莫如百步洪二詩更愛煙江疊嶂書圖
後刻畫畫意搜無遺我但見詩未見畫歷劫流轉今得之
玉堂醉筆噴醒然雲煙過眼省識稀秋山一角遠欲暮浮
拍水面青不住中隔素紙空復空儘放江長無盡處山斜

經遺堂全集卷之十一
四
林深岸無路山藏樹根祗畫樹孤舟坐對天蒼茫似有愁
心不吹去畫師束手那得成拍案呼出王晉卿惟君命意
自殊絕何待撫卷移我情不忘在莒古忠愛一畫未足重
友生發源入海歎江水借舟載我還山耕

長歌寄懷練塘

我方登第君不死未必天教如是止日聞下士蒼蠅聲且
教一喝聾其耳桃花結實三千春蓬萊清淺海生塵與君
一念偶墮地掘衣徑捨銀河津我從太華峯前過蓮花作
骨支嶙峋君也崑崙頂上太古雪御風高結玲瓏身下視
人間復相遇舊遊人豈知其故紅塵白日空茫茫苦欲攀
畱百年住發狂好夜同登臺月華如水添深杯君傾心者

李白一人耳過此不無太息天生才君從何處攜來五色

筆迺是混沌以前一寸鐵雕鑄不屑就雲山素壁千尋爲

君裂大江西注蛟龍驚風酣雨橫一作雨酣風橫墨鬪聲五丁縮

手攬不去鬼神那敢辭蒲城深房又落丁香子土墻沿井

陰陰水五更吹煞玉梨花冷雲遙祭雷塘鬼劉午唐死記二年矣

得逢君十載前高樓望海焦山船闌干拍遍相倚醉延津

劍合光冲天燈船纜罷秦淮酒公車又折灣頭柳聯床暫

客海陵倉北門望望還分手明年落花西蠡濱抱疴歸來

愁故人過江傷秋更同病里中傳死幸不真計君往返金

陵路長年我亦京師住但看老去不知時但有相思不知

數天門鬼斧磨金碑篆斗大字盤神螭滄洲五嶽根腳底

挂瓢策杖將從誰昌谷小兒不足數何況餘子如飛灰活
人雙手搗元藥咳唾震瓦翻春雷生不驟騎魚鶴去死無
分與螻蟻蕙立身蒼茫足大笑如何不見令心哀不作無
益爲世重方信大言有實用

憫忠寺晤石橋長老書贈

輭陰靜壓城南天竹雞隔墻嘯午煙鄉音空館揖延客椿
花如雨鋪庭飄導入別院廊東偏暗窗粉蝕蝸吐涎青籐
盈架敞其外紫花開盡藤葉相牽連餉以苦茗醒酒顛喜
吐鄉音益勤拳我款乍通師聞久慙愧姓氏爭流傳故鄉
十里菱菱田小紅橋轉掃垢山孤菴冷碧閉秋雨上人一
笠畱五年記曾出郭邀謫仙水風緩送涼篷船菴門剝啄

振空響竹亭晚坐聽鳴蟬適未見師仰師賢以詩記事凡
四篇自拋清賞逐塵劫夢魂夜夜古渡垂楊灣打包更有
師也便二千里外布襪青行纏人生踪跡那可料奈何證
我忘家禪心事錯忤空鬢元語含蔬筍非時妍半生電隙
行逝矣尙有宛轉區中緣不羈判作長安眠家山舊雨聽
杳然擬招好手爲我勝遊補畫橐母使詩人逸事久就湮

贈施琴泉

杓

錢塘師門

李寶幢先生

蓬萊窟枝枝琪樹森高骨君年最綺才

不羈好春湖水同清發看張六翮凌長風且憑隻手推圓
月寒食醉倒金明池王孫出遊夜不歸衣上星明露華冷
墻角花開犬吠遲曉陰如水燕飛破剪雨不得飄成絲竹

篷漏日槐陰午曲街開門喚街鼓滿堂會食縱饒
內府賜酒嘗清苦歌我新詞風雨來恐被一卷丁甲取我
家梨花樹底屋幾閒板扉晝閉如深山二千里外長江水
一葉吞天久不還草堂貲買山錢豈不懷歸士無田故人
書來萬金直纏綿勸我謝華軒朔風兩年元髮冷青山豎
骨遊子影

清時才大早致身好藉通波雪曹井更消幾按金縷衣秋
之爲氣送將歸醉翁草木都可敬何況高義清才當世希

幽鳳謠

畫樓好夢沈金井幽鳳獨宿桐花冷可憐鳳去畫樓空閒
門月照烏棲影記得親提寶劍囊生芻白馬斷人腸君家
種梨妾家柳坐君堂前雪新藕夜闌牢落三五星河漢年
年風浪生惟有寒光動射角樓頭流照還分明燕尾涎涎
春自語轆轤恨深縷難舉還君明珠淚如雨人生有情奈
何許

過洪疏谷畱同張丈漁山 輅 飲感懷一首卽席成

北風裂膚日苦短衝寒晚過靜雪館君與別久覺話濃呼
童置酒堅畱款座中詩叟漁山翁卯飲連宵顏發紅醉來
筆力出牛努疾掃紙上如飄風遂無遺意成高唱道我昌

詩緣少壯 席間張贈疏谷詩云愛左司 嗟翁老驥謝天山

絡頭我亦同凋喪幾年客京師依人旅食心自嗤頻歲住
鄉里鹽米不支貧欲死當年翁才擅獨出騰蹕何如我今

日牽連世故曾幾時桑榆到眼春蕭瑟况我墮地憂傷多
那堪人墨交相磨華年流水日夜駛元髮不駐如翁何昔
花全伐井全改壁上題痕了無在更有三郎胡三屢行役
飄若浮雲渺東海君時覺我心苦悲慰我春回遠人歸羽
征鱗負變時物如此年年我已衰主人飽詩客飽酒張燈
我起扶翁走

秦九字璽歌

秦皇銷金亦銷石鑿山使立更刻之夜鬼罷哭雨粟止大
變古書丞相斯咸陽宮中忌疾疾上壽往往多諛辭輶輶
東來豈勿藥三十六郡皆瘡痍寇觸不退麋鹿走獨畱餘
地容盤螭重瞳入關載寶玉神靈何物能護持吾聞刻璽
始嬴氏巧偷彊奪成乖離受命壽昌亦此旨更贅九字參
秦碑光瑩玉色想當日旣火四角仍截脂一線黑黝遂增
醜金甌那可傷毫釐鐵船男女哭沈海風聲寶氣三山悲
藍田一脈接星宿物華國運乘興衰昆吾刀不削羣盜惜
我筆未相磨治飛龍蜿蜒雲變滅中有歷代摩抄詞匹夫
懷璧用爲罪珍藏更數前人誰

人日簡胡三薌谷

玉在掘浦

昔者退之送東野遠遊聯句枯不華右丞別業與裴九山
中無語非煙霞新春幾日有閒意遶案獨嗅紅梅花念君
久客忘是客海鷗江燕同爲家當時形跡殊草草咫尺容
易成天涯而今交遊不可數清譚何處風鑪茶行年三十

未老至已覺閱世恒河沙幾莖白髮鏡中換未春秀草驚
先芽知我幸不差臭味世議爭欲相疵瑕我生萬事怕回
首不獨聚散堪咨嗟昨從城西沿野望絕憶短棹穿蒹葭
煙波一色飲湖淥尚嫌魚鳥微誼譁舊遊可尋決長往無
緣吹我河帆斜丈夫束手百不一稱意但能作詩潑墨如
翻車

學韓感春四首

物華逢時人所歡青天和光雜花繁彌空誕漫好顏色開
落自由纔隔餐一晴風雨敢蔽我變辭欲往梁父艱所思
處處那可遂徒喚奈何銷盛年

春人迷離兩相等天氣懊惱最不禁繡羅衣裳照正好水

邊簫鼓多哀吟鶯歌燕舞徒好事曾未入室窺人心豈須

摧落惜老物年少富貴誰可任達哉徑往酒罈臥一醉儘

擲千黃金漸離高東井道死公幹劉午塘天公讌久罷筑響沉

記讀離騷演易象同氣有若磁引鍼詩卷不畱釣竿失天

地白老滄波深謫仙當日感逆旅芳園秉燭桃李陰一作非夜

陰天公高居性命賤元髮冉冉霜來侵

高軒過不納大雪僵不臥虛堂金石聲朗朗出寒餓冥搜

衆得空心兵萬卷破門戶七世清風雲幾回挫畱齒齧菜

根飢餓未肯墮

意中圖畫卽樵漁空羨乾愁都不居水有饞蛟嶺渴虎求

救將伯那得呼浮生囚繫在衣食獨往何地非危塗而我

心非石可轉傲骨直上剗天孤手持空盃醒觀物不醉底
事須人扶箕斗不神謝庸福指我集苑仍於枯韓蘇被放
日月食晚境得雪遂清娛丈夫不死百可用局促卑老何
爲乎

薊谷歸自掘浦招同練塘疏谷南池秋泛

古樹無花草不春大海飛霜夢如塵尋源江漢鵠翔小著
我故衣思故人金刀玉案不離手天風吹冷旗亭酒狂來
自讀懷君詩屋瓦羣飛月亂走前年君歸心就衰去年君
歸白鬢絲今年喪子學東野告天不聞難收悲是年七月
金長子德
源少年名馳洛陽陌煙雲落紙黃金積草堂剩有未銷魂
常握珊瑚架前筆范公隄下久住君姑蘇人上范公墳將

相出入忘海嶽豈知富貴如浮雲射雉城隅半園水撐拄
江天四公子短氣詞華祧六朝井底應貯南遷史空囊不
能名一錢白骨不能招之前故人不能麋鹿守快心此聚
眞奇緣扁舟移盡垂楊岸散髮篷窗數初雁攤牀爭臥綠
陰深軒軒遠近風塵面湖光一碧船爲家園門人開簪桂
花我生懷抱向秋盡不遊何以酬煙霞自惜著作百且忍
不妨他故供人哂諸君泥醉儘歡呼酒價憑高我衣準

冬懷

墮地驚心遽三十庭樹盤鴉送短日許身稷契彼何人致
主堯舜終何術家食差蒙免死幸遠行况無吉日出蓼味
當胸自淺深壁立但有持身律遵古率性爲俗患平謗傷

自反慰其歎平聲取人所挾情所忌親愛未可輕相干却憐
人事同人面一日憑看百千變獨矢冬心轉罪松曾煩遠
識先傷霰霜華沈沈雲不波杯水酌月儂當歌如流似卷
歲不與豪華泯滅何其多當時與我爭梨棗生子於今滿
懷抱牛羊腓字非人爲憂雨何心空百草蓬蓬谿壑迴遠
春遣累幸非衰老身我生乘化何不可展轉爲有高堂親

哀王孝廉蘭洲朝

見山樓前山不改見山樓中人不在長年慣催人作塵西
風自送江入海文章果難作元命冰雪不免塵真宰人生
幾日迺偶遊花開一春况剪綵古人無聊空立名來者無
極那可待黃金未妨隨手空綠鬢試於何地買山崩樓摧

江倒流丈夫未死須磊磊

送陳大理堂變遊梁

記辭底柱從天崩赤縣碎坼黃河走一綫力與江淮并間
世競學辛壬手天心暫罷瓠子衝民氣漸復宣房後君方
挾策贊使君溝渠得職還綠畝好因地利事休養俾供貞
賦歡童叟餘力何妨治汴渦窮源且緩探星宿參軍掾名
金石輝弔古登臺眞腐臭

詩人適與嫩春會益益秀色騰寒齋如何執手短夢裏一
饑驅使行天涯年來海內弄長句君外尙有何人佳臙脂
坡裘邯鄲枕醉骨昨共長鑣薶黃仲天橋酒樓銀漢上心
語狂放由吾儕潞河寄章不我報奈何雨絕終雲乖搏沙

在手難把玩望遠棖觸平生懷杜門剩我貧病客一春不
跋衝泥鞢浮生蠢動那有極葉舟日日浮清淮把君行卷
三歎息賣花聲鬧城南街

月夜篇同胡三薌谷

月華冷射愁城破笑袒秋衫天上坐樽前但有餐霞人清
氣滿湖君一箇沙河塘上把酒卮河流不似人心遲四時
好景亦解道但與離人都不宜春草春花滿江國停雲空
齋俯默塞踏歌聲中一片心如畫煙波遊不得青青浮萍
白白鷗喜君歸來方早秋里中老死人無數而我與君胡
不遊涉江采鮮飲淥水何必猩脣鯉魚尾遇處金龜解最
輕醉倒玉山呼又起乍相別還相邀天街橫水月夜遙綠
楊城西白石橋玉盤墮珠徑寸耳騎橋脫我宮錦袍桃花
源遠春波碧桂樹山幽露華濕與君揮手蒼蠅聲後有來
者無終極

艤舟亭後遊

東坡近體詩高格野宿常州守除夕鄉音無伴思西歸殘
燈一夜孤舟客此亭爭傳公艤舟舟停應卽是此遊嶺海
歸來宅孫氏便擬終老非拍浮帝哲知人酬不得

宋仁宗幾

曾苦愛高官職野火低星前夢回贛江雙淚清盈臆我初
來記十年前緩駕吳中赤馬船草堂澹盡梨雲色征衫熱
撲楊絲煙長橋遠控周郎砦一片春陽油踏菜訪公遺蹟
和公吟合沓名流動高會院壁移筐扶病僧設果僧雛呼

不謗彊支茶竈倦對客自歎住世如風燈揭隨颺輪追日
軌塵沙迷我彫元髮幾家甲第都飛灰幾人達官未歸骨
艤舟亭今又登秋花無香門晝扃病者人腊坐龕裡僧雛
老大瘡血腥洗硯池平波不起龍尾雲飛顧塘水人生但
求陽羨田萬事無聞沒餘齒三十科名非較遲更一迴翔
我恐衰三過門間老病死歸舟仍味坡公詩

湖舫夜泛同胡三薌谷

丈夫生不橫行青海頭橫腰寶劍都王侯又不能腳踏芒
屨遊五嶽仙人飽贈長生藥青春坐失北窗裡百鍊之鋼
成繞指殘杯冷炙潛悲辛古來賦命多如此李北海裴尙
書處世若大夢鐘鼎胡不疎蓬萊文章香案骨隻手青天

攬圓月煙波一碧連高寒且掉扁舟同散髮浮雲與人並
世生直可酣暢萬古情滿湖藻荇不得涉與君夜涼吹玉
笙幾人少年盛冠蓋飄忽先歸不相待幾人意氣中迺衰
恩疎媒勞志方乖感此直下男兒淚黃金如山買君醉要
我興盡迴酒船東方旣白星斗墜將相出入馬前塵兒女
長大眼前人白壁抵換歌與笑狂死不負珠簾春楊柳絲
繁吹雨過十丈松風就高臥山堂沈沈鐘磬哀攜手桐岡
碑下薶

平山堂側潘桐岡
山人碑文絕佳

讀李白詩簡薌谷

謫仙文章有生氣如天雲霞山紫翠賀監金龜擲酒樓殷
公亦解五雲裘襄陽歌山簡青山懷謝朓清風明月不要

錢舉杯仰向青天笑醉中往往思神山浮生那不凋朱顏
朝爲青絲暮白雪興到且盡今日歡戲弄人間原偶住月
好江清便歸去六合仙風尙可披九天珠玉吹何處君昔
作詩追古人我今讀詩更憶君丈夫恥求升斗活我輩豈
是蓬蒿身園禽變盡餘紅謝遠人歸來及初夏將衣沾酒
不復疑攜手登艫美清夜我弄圓珠攀露荷君垂兩足揚
素波一杯入手莫輕放流光欺人怕蹉跎綠陰深深豈常
好風霜轉眼枯秋草黃河入海不西歸人到中年總趨老
中宵露冷冰雪骨逸興悲餘轉清發長吟欲和雲中君醉
倒便臥石上月騎鯨碧海人不來荷鍤非狂死非才不築
糟臺卽文冢底須世上閒邱隴

經遺堂全集卷之十二

七言三

江都韋佩金西山

送鮑秀才英遊江甯有序

秀才三十六峯上人二十四橋邊客逸氣霞舉

高文錦新僕仰竊風流頻厠言笑今年七月旣

望襍被薄遊書畫便艇雅泛綠波小住白門過

江而譚清登山而秋悲坐收名勝益富製作行

者張翮以喜賤子垂翅而歎浮雲先發溝水焉

流老皓月於草堂殉黃葉於蒿徑辜負夙願夢

想名區維時流連落景出沒片席汀葭露零江

草風偃晚花俟夜潮同上秋色以夕陰全起元

蟬漸咽斷續涼雨赤馬白騰飄閃絕電遶弔古
之捷步訂歸山之後期敢羨飛跡不免長言

季鷹陽冰不復作李杜文章寡棲託天下何曾少山水名
士難忘在邱壑朝刷幽并西入秦晚望洞庭渺無津河聲
嶽色醞胸臆塵海茫茫愁殺人三霄之露斟爲酒不穀澆
君譚天口中山之毛縛爲帚不穀供君補天手雲霞競傳
鴻鵠舉塵埃肯顧牛馬走爲我道姑孰溪輕程一夜水東
西爲我指新安江扁舟六日下餘杭書堆生面笑絕倒縱
未能遊夢亦好有僕戒塗前致詞眼前輸君出門早煙波
淼淼吹我心挂在江南青楓林清涼山雨清淮月儘君臥
遊秋色深迴光寺畔城隅路我十年前曾此住猿鶴於今
憶舊遊都煩收入驚人句寶劍三山照一街浮雲雨花飄
一臺回首琴書海草落置身圖畫江天開君行選勝非行
邁不用臨歧耿別態年年秋井塌蓬蒿拔宅神仙甯我待
獨立千古手筆新獨行萬里肝膽真客星夜夜犯河漢我
輩豈是帷房人

題費生_潛深柳讀書圖

尋常風日不到處密於秋樹疎於龕高林露華出人外醜
郁理氣天爲參我昔把書雪打屋凍吟風味獨所諳自非
同室一燈照未可話我苦與甘取上無已中迺得淺嘗不
屑將毋貪生乎勉旃躬其際與柳一以深相涵韓調張籍
西明寺遠勝示符讀城南堪羨羣兒樹根坐背誦所憶聲

喃喃韶春豈可當把玩瞬同蒲柳零江潭母使生意婆娑
戕賊衆樹猶如此人何堪

哀陳孝廉豹山

宣

草堂臥病二十日懷人感遇心煩憂夢中畧記訪君路湖
田綠飯柴門幽傾壺醉遣魚蟹晚滿盤冷飮菱菱秋八年
前與偕計吏連天風雪同扁舟枯蓮蓬樣對瑟縮有臺不
得登文游君時破寒走精銳肉薄掠陣搃戈矛我彊一鼓
捧枵腹氣矜那敢當春蹂篷窗當日君未老已見白髮垂
盈頭精先亡矣難久視如到岸船帆未收想當君奪造化
日側有苦厭言語稠腕下精靈夜驅去預於佳處營山邱
酒肉祭都滿北郭知交淚豈勝西州負君多端慟哭返故
人進學聞無由有不與君俱去者夜光到枕蘭亭畱

富方竹樓

元鹿

城東地藏菴僧小山圓寂前一年招同金棕亭
鄭韓城方竹樓於寒香館作東坡生日各賦五
言詩而別後三年於吾友洪疏谷案頭見竹樓
畫十幅幅系以詩余絕愛之乞以歸又二年余
會葬戴二兩峯先孺人之喪於儀真甫入人中
望有白髮長身童子扶而出者余以爲必竹樓
也追與語弗及訪又不值歸數日詩來恨相失
竹樓年逾六十未死之緣其餘幾何及余在山
亦止一期前塵可感良晤宜圖畱詩一章雨夜

成

江月近人不盈咫天月去人千萬里生涯我合抱孤槎傍
君一夜同江水無心出山倏爾歸追之不及尋思悲空齋
展畫仍前讀忽枉瑤華照燈綠古琴凍合久不彈思煞寒
香館中宿壤食那有龜息靜筆鋒防與顛毛禿斟酌山中
老結隣不就叢花就孤竹

贈葉大吟霜

永福 邑諸生善話漢
趙順平宋宗畱守故事

笑脫儒冠赤雙手瞋目欲叱而公走舌存定無餓死法逢
人自指譚天口攝衣登座何慨慷聞聲辟易聽者僵曹兵
窮追遣諸葛金人急圍罷李綱野哭旗靡土山下亂火礮
發牟駝岡正當馳驟風雨寂故掩客耳愁滄桑主人停觴

促以意改席燒燈更矜祕激盡人間壯士肝妙寫千秋可
人事吐君胸中不平氣趙順平百萬軍中龍子睡殺人如
草血腥膩宗畱守長河死湧三聲淚南渡江山弄爲戲高
叫秋空壯以哀兒臣趙構孤窮備興亡頃刻漏清嚴鬼神
有無月破碎大言淋漓忽復吞仰天傲然揖出門幸逢天
下無風塵不動元武張鈞陳酣歌罷喚丁都護茅屋間尋
已上人衆中几席令人俗忠魂廣場將毋瀆讀書淚盡出
師表憤奸齒碎風波獄千樹穠花戰血斑半盤殘劫偏安
局夜深獨自語精靈清磬一聲山水綠

同汪容甫

中

訪朱山人二亭

篋

對酒述懷

甫也才地最孤潔江水見底秋月高
清言之祖建安骨揮

斥三唐呵六朝元瑜善病陳思貶過此略推劉孝標常謂
周衰文統絕騷史以外粕與糟出君便腹爲大冶石才棟
書投煎熬鎔之百過煙火盡一滴着地皆成膏不比酸冷
爭派別教人尋味持空螯天寒野陰懷抱惡城南會合訪
孟郊多竹款門笑開口且斟濁酒饑腸澆

述祖德詩

謁選北上
展墓作

岷嶓一脈天西來包漢汾江抵淮海長岡截水勢欲迴陡

起中有佳城在濠梁真人定九州我祖畧地東南陬

明初
遠祖

勤保以從征方國珍功
世襲錦衣衛指揮使

未陪主將雞鳴廟敢望通門龍額

侯內橋西畔郎官第帶刀掖門入宿衛朝廷懋賞三百年
御勅傳家十五世羣盜中原百戰場京洛銅駝浮渡江力

殫半壁雷都守痛塞衝鋒十數創紛紛庾信開朱雀堂堂

袁粲死青塘

五世祖幹以
守雷都死難

失巢燕飛江北路王成傭保勤

調護遺孤長大渡江回清明灑涕城南墓葛帔淒涼一愍

孫今時爲庶爲清門古心愛過竹西寺聚景無如春貢園

臨江汲水僧瓢沒井華汲取川江物等將萬里昆吾岡不

斷山青老薶骨

高祖郁遂公遷揚州舊
城沒葬竹西寺東阡

木蘭院外茅爲廬

逮我相承五世居恥隨縛袴羣兒戲耽坐虛堂讀父書幽

光夜發春官硯家風韋曲紅綾宴丁年咫尺

奏通籍丙科十載今催選

京闕迢迢赴一官愴懷墓道欲辭難稍提傀儡登場劇忍

付松楸老佃看從來葉脫頻思樹此日泉流尙在山春船

網魚白尾尾卻餞揮杯中席起元亮參軍經曲阿謝元前
蹟陳淝水絳跣須防渝白華赤心無刻忘青史何日成勞
許拂衣仍服先疇歸跋履墓田耕較蜀山饒石表補樹長
千里

京師晤施秀才

杓感舊却贈

天橋四望高中央西風吹人涕霑裳駿馬不馳劍不利十
年欲度河無梁紅塵十丈彊官道十里長車聲殷殷執手
歎昔日少年今老蒼將進酒且停觴宣武門東海波寺燈
光明明客登堂堂外馬噉其與君臥起東西廂堂上大合
樂絲聲肉聲兼夜長涼秋八九月飛花蝴蝶黃臘月大風
雪手轉木倉榭座有美人清且揚舞鞞小小窄襖襠一街
日出一街雨城北之徐東家王情事大拉雜變遷難意量
主人無由見父子歸北邙門前綠苔滿昨來府吏收官房
悼房師李寶幢先生暨世講編修鎔君也好身手抑塞磊落滯
帝鄉人生那有百年壽走何跋跋意遑遑竹竿魚尾千尋
江飛彈逐肉肉已翔天門打鼓聲琅琅高歌別君詩四章
長安市上驚看煞拍手大笑官人狂

讀五代史

野豬走入仁壽宮怒騰獨眼沙陀龍冤句仗劍橫遺孽陳
根仙李飄秋蓬乞巧樓頭譟軍亂延喜樓頭放官散龍興
二百九十年不圖晉水清歸汴真龍失水兩入川嶺南一
龍飛上天飛處樂紇千雀領陣鴉雛破空落自改天祐稱

同光無復英氣三垂岡李亞子得以三矢訖流矢李天下
俳諧虐於戟手罵花羞無影祝焚香似聞不聞天茫茫賞
功先封趙在禮壯士甯甘鳳翔死軍中夜博令公迴河津
酣飲石郎來神州忍棄燕山外十萬橫磨劍安在打來草
穀帝爲把禍同春磨人成寨劉河東不畱麥飯奠明宗豈
知四年三世湘陰公郭侍中黃旗擁身移漢宮豈知房陵
徙所謚作恭與亂異道兩異姓於時小康未稱盛阻兵擁
立將卒驕藩鎮積習猶前朝王官隱士墜朝笏華山隱士
徵不出火龍翔起來馬營一照香光劫魔畢

古寺多碑僧輒碎以冪地

鏤金作花鋪地面未必金賤人不賤量地織毯費萬絲愁
脫人衣裝地衣刻碣石門匠爭鑿采石未放山青減當年
上石工無名而今拽到僧有膽僧護僧法龕與幢粗沙磨
砥來牽扛文字擢髮憑僧剗踐人如葦佛不管君不見周
宣鼓古文欲讀箝在口散置人間窪作臼又不見麴信陵
爲官但有邑人知江上無人爲立碑

題夏仲昭雨竹

并州剪刀剪生綃誰其畫者夏仲昭一石中立百草拜挺
兩竿竹森蕭蕭有明月光半邊落湘岷得鼻燕且削一家
枝葉自刪除本實先教暗中斲金川門開龍孫火舊臣掃
盡如掃籜崑山得第轉外官往事胸中頗鬱盤但寫一枝
金一鋌別有生氣吞琅玕豈惟張益不敢畫筆迹遠過王

孟端此後壽山采竹瀝奪門釁起將軍石朝房可惜無先
生一時光景畫不得礦使四出分東廠擾甚宣和花石賞
履霜未警堅連枝大小中書曷同景畫亦不可盡事亦不
可知君不見錢王墨竹雷雨垂子孫幾葉秋風吹又不見
南唐花落五更雨夢灑青羊鹽竹枝

居庸關

九邊聯絡衛畿輔其中最險爲居庸貼面大壁曹無路煙
嵐結聚石氣濃絕者爲陁日光漏許從一綫窺天容兩厓
陰森鬪奇醜嗟呀腳下攢奇峯盤盤磴道未半上駭絕下
馬扶孤筇當年闔狗亂天紀乘輿輕出櫻狂鋒偏師偶陷
六軍走青衣蒙面羞金墉元謀堅壁外清野首嚴鎖鑰關
門重元年五年五八月戾陵再造誠功宗車箱之口萬夫
阻後來豈少丸泥封開門納敵有家法豢奸肘腋叢戈鏃
可憐明亡竟坐此中官罪更浮段工安得高懸鐵牌字上
方借劍誅元兇開成宰相任邊事急與使者籌盧龍絕糧
媯蔚北七鎮能使坐困銷狼烽前代此關扼轉運中原元
氣山青蔥東第一陁太行臂形勝更不愁臨衝崎嶇度嶺
就炊汲人家三五如窠蜂興來潑墨厓石上不須題撰兼
淳邕興衰理亂數語耳喝起山靈睡裏驚遊蹤

東阿縣西揚劉鎮朱梁之師與李亞子相距七年
處也

朱五經兒作天子天許再傳無此理鴉雛變白出天井直

擬頑狼負三矢瘍首先王賴有靈奮身諸將都甘死河北
軍州席卷來取蔽黎陽沒鎗水楊五知兵料如神一步百
計更可人出奇不得須斷餉持重老却并州軍請十斛糧
中使至飲水盡人難盡器制變臨機闔外事促戰從來無
一利方圓陣合元城西敗卒登木鳥失棲義昌退能死拒
敵經年苦障黃河隄責以失守解兵柄貞明白蹙垂亡命
冰川省聞渡馬聲乘輿驚敗郊天興臨陳易帥古不宜拈
子敲枰况難定已將輕騎襲東平空賺疲奔牽德勝鬪雞
小兒太披猖事急須用王鐵鎗逮死大聲張國勢人名豹
皮日月光兩計不成掩晉陽卽用其奇走大梁孝子赴讐
無反顧沈謀誤敵在多方南朝賂帥迷君眼逍遙河上心
先反擁衆六萬看中都全師畱送同光款不枉供軍三鎮
勞畧嫌殄寇天心晚十年兵甲洗猶腥百戰山河春不暖
想冒矢石橫戈矛更分兵力鎮與幽一面獨當付李周相
持不下家蒼頭英風颯爽如昨日今仍村鎮名揚劉承平
水市民居稠牖雨老兵催漕舟

劉伶墓

日月到今那可隤六合千古不得開黃河萬里瀉胸臆供
君一吸十萬盃泰山兒孫羅蒙嶧磊磊築就糟邱臺佯狂
一鍤到處荷笑指此壤真成蕙那得才人竟無癖兩眼覲
覲辦討賊局終兒輩成奇功一盃温可誅劉石拜官迺止
參軍事想見生平不得志義熙以後折腰難南山又有人

同醉

結交行寄張大令

選番禹人時
權保安州事

結交行結交行少年鄉貢上

帝京道逢一士心相傾君幼是弟我爲兄車騎如雷蓋如
雲五月別君金馬門飛鴻失次羊失羣十月拋我煙花津
商船北來得君問嶺南諸家聯及雋上言獨往遊銅官惜
我未葢茅三閒落花流水杳人世月華寺古空青山下言
夜踏蓬萊股我生毛羽能輕舉東方草木浮海來與君離
合爲風雨蝶破繭鷹辭鞴出門典却千金裘俊遊最好惟
揚州記我家居近紅樓美人如花樓上頭賣花聲中斛春
愁卷簾正挂珊瑚鈎入門吟繞庭前樹歎息空囊竟成去

長安市上車遙遙三月三日天之橋憐我花時還緼袍酒
樓解贈金錯刀白眼醉望青天高豐臺花開夏初變題名
我赴慈恩宴燕山雪片如花飛擁帳君聽金縷衣夜不歸
小除夕柝聲虎旅金門戟曉相尋小寒食玉河新柳穿金
鯽回山轉海無不爲倒意傾情更何惜只道相逢無別離
只知行樂無終極明年我將應制科君方厭走胭脂坡送
出橫門三十里驅車不知何者是風笛將無催入秦更遠
隴頭西去水西去人傳向金城兩河如帶爭來迎交情如
許却輸與出山雖分終合并剩我顛顛京華住亟買扁舟
下通路江東却歸尋故巢渭北遊踪定何處從此參辰又
十年未知相見何因緣激昂自致青雲上山後雄州資保

障訪秋招我出關門脚底青峯竦殊狀宦遊人身轉蓬我
巢南枝君北風源湘澗蔭青松爾我結交較此濃管廣容
接綠榕君家我官望可通廿載煙雲無盡變過眼關山千
萬重新霜日夜點明鏡相思送老豪情空結交行吟難罷
安得譚天口茶瓜從頭話安得寫生手水墨逐扇畫如花
歡意那禁謝似酒餘年豈勝瀉結交吟涕泗下

時金謁選
銓授蒼梧

縣

誰氏子

非病是病誰氏子生是虛生死彊死未死先盡難復來流
不到海那成水盡人精氣保不替皇古到今不得逝人都
能自延其年形骸枕藉上塞天幼逐鄉里長四方問病送
死朝暮忙花經風雨不浹旬生滿百歲能幾人華燈夜築
堂前墳酒肉臭積道路聞腐腸伐性乞速夭尙恐塗紆進
藥草蜉蝣蟪蛄自稱壽倉卒臨頭豈能救三秋落葉五更
漏只有文章死天後

溇陽夜泊聞歌

月魄旁死霜滿天溇陽江寒夜泊船城燈岸火射篷底舟
人偶語客不眠從無乍有纖歌起半入江天半在水一字
先摧獨客心幾聲漸入愁人耳靡靡曼曼相遞生欲抑還
揚最有情大江千古照白月不畱前客聽今聲搖舟復轉
難成去似認當年過船處何年不有清秋夜何事能忘少
年遇一歌中人百節諧再歌忽斷音苦悲不和琵琶和江

水流盡公詩公不知忽感天涯賣歌婦宛向生平解詩嫗
送老不放風情減灑淚未免男兒誤夜闌伐鼓江上亭夢
破但有江峯青我詩棘口如苦筍餉客一洗江魚鯉

次對瀘口遇風

嘉魚縣南古瀘口泊舟隔岸臨危砭曉從沙際泛一葉香
林磬過飄風幢將軍廟祀本舊第

吳冠軍將
軍丁奉

塑深赤色生

前麗綠袍烏幘按劍坐想見臨陣飛奔驪身大呼衆軍
進敵衆退走相驚懽齊勛瑜肅燒赤壁姓名鐘鼎銘吳邦
諸君甘死肯翊漢誓師熱血噴盈腔徐塘乘勝向宛洛西
會巴蜀齊戈鏃疑冢快可斲奸骨肉糜何至基愚蠢我言
追責不無謂而神奮怒雙瞳眈變天地色白日黯烈風駭

浪高衝撞行人咫尺都斷渡那許書客攀船窗嗟予繭足
走九塞手摩石佛穿崆峒南望秦岱涉沂泗聞河餘潦沈
徒枉天門馬當更萬險柁樓暝踏波淙淙晴川閣開招黃
鶴眼空雲夢吞湖江賦命窮薄甘一賭肯懾生死心忡忡
想神有意乞文字萬豚爭拜畱輕艤抑或天意厭雕刻要
與山水完沌厖南行我至舜藏所搜剔邃古恣喧囂神奸
魑魅各失色懼我圖鑄窮軀體瀟湘沅灘從講畫儘教吟
咏沿灘瀧春猿秋鶴蕉荔子死且立廟羅池雙壯遊得此
實堪忌蛟宮怒鼓聲逢逢江神入夜倍虓武戈鏃甲馬紛
錚縱我時側帽坐磯孔百錢呼僕翻村缸酒花香起水腥
失按膝笑受螭龍降萬怪不驕捧殘月解纜亟拔枯楊椿

瘳糜潑紙吐長句風簷未暇挑僧釘

紀事詩二首

金蒞蒼梧匝月夜登舟失足墮大江中行二里
許遇救得活且無涓滴水爲河魚腹患明年秋
杪坐大屋中忽曹然自失如人掖出戶外負墻
立回望屋以棟折壓地所坐榻糜碎余倖無纖
芥傷上官寮吏及邑人皆奇其事云

我心雖清不至此爲愛江清直應死漁火滅浦月墜江攀
舷一落千丈強江深流長踏不住不道虛無有眞路東坡
洗心七百年半夜捫之得其處此時睡龍驚且趨信我不
涎頷下珠稍防大言洩幽怪拒母觀海寫海圖戰船舊熟
火山火鐵鑊截江燒未枯蛟宮女乘夜潮上縱橫密織紅
珊瑚幾枝鐵骨卻不受教於明處飄衣裾舫全側舉網
重兩臂得援頭難扶百等波底平安地變海爲田等兒戲
老親解衣換溼衣漬滿斑斑哭兒淚命宮星愧非長庚騎
鯨竟死我更生

右江溺

屋梁閣背坐兀兀昏不知人當天立邱山萬牛無一聲誰
何負我空中行飛電掣影驚迴睇羣瓦刺天屋在地適來
坐我六尺牀慷慨糜軀代我碎江魚出聽城烏翔觀者走
集如堵墻僉云懦夫巧趨避白刃在前百摧藏官披肝膽
豈惜死倉卒出險不得傷此時韋虎意氣盛爲語呂姥兼

蕭娘我

皇盛德漸越裳古未內附今來王上公臨當駐節鉞

詔下醑讌薰風堂

是年安南國王阮光平來朝福忠勇公迎餞於梧州郡署署在迎薰門內五月

朔十二月三日禮再成

小臣奔走與盛典以翊忠勇郵梯航賓禮初

筵樂新譜衆中許我身軒昂假饒折臂斷脰死厭同畏溺
非國良君不見大開明堂紀麟閣百神浹汗趨觚爵荒服
都無天札人卑官坐享耆年樂

右屋壓

行役鳳岡雨宿白蔣廟

我來却渡桃花水兩岸不見桃花開溪行未盡紅樹遠小
舟載雨沿源來山蹊一綫亂流奪身倚危巖趾木末絕險
將如笠屐何失聲肯乞漁樵活僕夫屏息壯者孱前騎迷
津久不還向夕天仍接風雨隔溪人望昏雲山猿緣不升
鳥不度壘棧攀絙竟成去渡旁畱待茅三間殘客深宵同
雨住遠村雞犬喧初晴西行連逕堡名改山程落花香滿青
溪水記得經過畫不成

西陡河

昔觀遏汶戴村壩近見分湘陽海山七十二級越城嶠暢
洩水府開天關龍城龍壁距馬鞍蘭麻古欖脈理聯下漏
水纔經理定木皮江不過三門茅苧濛濛深淵虺蛇窟
宅非通川漂柿欲沈投羽沒泗人水手俱心寒巨靈西來
擘嶺穿許從一綫相鉤連天潢近躔銀漢度山神噴散老

龍涎我記入粵七載前啓層洞門跛脚眠

靈川縣東十五里前過北陡河

遊此靈湫濯足魚四足捉魚忘放澗江船豈料轉徙經此間

險惡倍之出窅難樾戶無樞植援短風景更不逮北源通

以人力翻遷延在山過顛非自然大禹當日導九水智行

無事神功全何不取法上古官考工匠氏職掌專溝塗畎

眦都盡力卽有山徑堪延緣看我馬上笑着鞭且免陡夫

官差橫索錢

李少鶴憲詩集書後

君詩涵海負厚地餘力偶濬次山井

李梧州冰寺詩極廉峭

憑之以

氣久益騰古冰觸手捫不冷屈君吏才苦追元求君詩格

全鑄韓凜凜如女有正色高月獨出星芒寒出處交際於

辭直憂民師古懼失職大事特筆記朝廟爲雪詞人語無

益有時短簡寄別情古絃自彈無近聲卽之欲通理之在

幾人解從希處聽我避雷同陋非邦君忽自忘吞湖江大

雅不作那有此斫地高歌足傳矣

柳江臨發禮柳侯祠示守祠人向得

州人泣涕登侯堂侯死直欲攀其喪爭傳堂後侯所窆畱

數莖骨撐南荒願易播州急夢得不肯負友肯負國一肯

不掩予量移元和聖德真無極貞符淮雅補天手高文醇

意天所守相公京兆何足責斯人元老知應久分司畱看

元都花郎官委殉龍城柳盛唐所尙詞翰才幾人入理能

恢奇遺文朗詠擊雙柏大江風雨侯歸來清是乾坤真種

子到今生氣騰韓碑後來刻石填空解截裂憑將窖冬菜
羨爾閒身短後衣爲侯守祠打碑賣

泗城山至汾洲由繹而獨下有洞尤崛奇

胸中之奇鬱不吐槎枒峻角森撐拄三江盡頭儘一瀉凝
結山身萬萬古憂來氣轆不得長千斷一連繞羊腸奇峯
湧出各成獨際天特立老不僵競致雲雨積冰雪彊與接
牽心豈屑離立窮荒未合并尙教相見非成別直上帝座
笏與簪稍疏其下爲空嵌洞門然火仄不入或恐山破穿
天南山靈百出無專貴不肯鋪張懼材費清流出山底能
遂五里十里異水味

泗城水源詩

高天忽漏不可障好夜銀河半空放峯頭瀦海星宿翻下
視人間萬千丈鴻濛全濕風霆馳石不能言各相讓等閒
清氣慳一洩剌剔山靈空腑臍騰聲萬鼓喧建瓴地中仍
在干山上方二百里兩尾閭疊鎖重關限門闕郡城水經
流出枹村
至央里伏流五十里出爲水源
洞四十里至穿水岩又伏流天道地寶有畱餘常與邊
民氣爭旺洞亦不必爲之塞山亦不必爲之開花村水源

沙坳

穿水岩

各幽邃冥接風雨何奇哉靈源疏導或失職下

流延頸魚龍哀左江江神老無力何不倒流妙挽天心迴

橫水江

見王陽明文集水
色赤今呼紅水江

禹迹不到處魑魅如魚多上帝勅神官歲秋揮刀戈盡法
誅馘之腥血傾成河蠻荒春縟無花飛天紅豔紫摧爲糜

精神上騰遺汁滓不凍流膩渾淋漓炎官熱屬煩冤集鬱
紆但覺鴻濛翌萬里憑將赤岸通一條不放清江入北盤
水較南盤昏東界桂里凌雲東西石門興義府滿江崛奇
沒復出亂流不去蠻山根下流雷江紆一綫鬼門咫尺開
當面來從鬼國翻騰遍我有赤心照難見

靈根篇咏雙桂

我本墮謫人撒手輪却瀛洲塵跼束厚地自嫌身此意天
已聞傳語木公抱持古靈根扶桑若木高蒼渾曜華吞吐
太陰痕山河氣騰中直輪沐浴潢漢槎星辰分枝倒出涵
網緼一傳淮南八公藥變小山幽益春魂一澆嶺南降神
酒羅池暖冬蟠活雲秋零迺逐淮南葉不見還如嶺南雪
柯是珊瑚藥瑟瑟焉能隨人地上活我不訪神山啓石函
我不擊鼓叩天門但妨蠹作蟣蝨臣稍緣餘蔭丐賸馥蔓
延人世皆蘭蓀瓣香綿綿思雰雰疑無似有渺聲聞何年
創合吳剛樹何時月卻姮娥奔此意萬古資清真天荒地
老各自存閻虛不蝕中心醇多事乞靈草木仁

笑各自於開... 中心事多事... 靈草木...

... 門且故... 詩人... 山... 日...

經遺堂全集卷之十三

七言 四

江都韋佩金西山

莫三芷厓 汝濤 招集百色衙齋譚讌經旬相得歡甚
長句報謝兼以述懷

四山一夜雨潑火際曉衆綠生高低佳招過澗一舍近客
中襍被欣成攜君家花樹種筆底唐宋供奉名相躋崇蘭
墨寶湛古色點畫邃異時人迷清歡不辭坐遙夜往往酒
盡斟空甌斬新花蕊出盆盎屈指弦月當開齊東軒臥具
穩作質期我再至重畱題我官十年倦奔走蠻江風物更
暄淒幾時照鏡點霜雪幾人逐水飄鳧鷺幾多舊事風雨
散自踏行跡空餘悽挈家僑住水西屋桃榔接葉容貧棲

銅錢五百米一斗春簸畧免聞飢啼連宵好雨盛江漲便
思放溜隨流漸簿領三郡家一葉了無長物堪提齋歸塗
茫茫去亦住等閒不見淮南隄不妨畱聚一百月何事急
登三板聽潮雞

邊驛

邊驛荒荒罷朝請十載官身幻泡影青釭挑盡秋宵寒游
心天上非人間風雪房櫳臥冬暇策馬蕭蕭走元夜蘇沙
渡口水生纔塵堆舊館桃花開鈎簾忽放海燕入將書遠
自江南來江南風景春流宕瘴江忍對人惆悵燕不營巢
且築墳落紅堆裏銜泥葬不登陂隴無高低不耕禾畝無
東西二月不雨盡三月欲去淚落旄與倪奇窮不死老不
瘦吟情日晚空依舊晚食有肉對案難况辭安邑揮豬肝
難可遠近容人處三間茅屋爲僧去

邏里譚次聞徐上舍

華國酷嗜曝書亭集詩詞於今

兄菽浦巡檢

華豐

之歸也漫書長句却寄

君家二難住城北我家杜曲城之南開八十卷竹垞集熟
君舌本貪而饒我未晤君質懷抱喜此一卷君同好初寫
蘭亭恰好時文章第一臻神妙集中一字走一珠援据典
則刪榛蕪以言長短盡情變尤擅體物工詩餘補天之手
綴蕃錦星精才鬼隨奔趨最長五言學杜甫七言奇氣追
髯蘇銀河秋清出月露玉堂夜冷堆火茶能迴大雅元音
作不信才人命窮薄清華官老踰耄年虛左

東宮禮耆碩先生有道庇斯文肯教把卷淪溝壑沉沉春
夜挑春釭苦吟兩地推晨窗小長蘆水君較近五兒子橋
女兒江徐海鹽人客中作客顛毛白細與難兄話朱十風懷琴
趣眠狹斜有才如彼風流得瓣香一縷蟠精思及君譚讌
當有時亂山春草四十字且和見弟江東詩

白百色放舟寄莫三芷厓六首

宿東軒軒榻幽以尊初來蘭箭發再來樗實繁苔沿白粉
垣雨疎青竹根拋家江船不一顧羅帳從風窗紙翻宿東
軒千日等閒聚主人情重臨當去百遍腸迴榻懸處江上
水夢迢迢畫呼人出酒可澆一燈尋路簷竿梢宿東軒
賃江舟舟人雜黔楚竹斷不續篷不補鄉音絮絮將客侮

健兒踏浪如踏土富兒撒錢如撒雨姪女滿船工莫數客
垂空囊澁不語賃江舟惟君惠下車一年免常例我有窮
交敢畱滯充水手聚灘師放船隨流竹箭馳沿江石立爭
磨治步步刊君清德碑賃江舟

五花馬食君藿與苗更有牝馬四繫之維之夕復朝去年
馬毛縮今年馬骨高主人在牖馬在廐雖有盛氣何能豪
兼金彊我鬻於市券紙未寫心先悔五花馬口枚銜爲我
求價恐我見高義何殊君脫驂我今休官出無馬泛愛休

歌馬當下五花馬

崇蘭帖紙本精以堅芷厓六世祖明浙江布政使如不以忠賢子是龍刻有崇蘭館帖
夾雪名不用銀錠櫃一十八冊四百則義獻父子元氣完

天河洗研露蘸筆草中之聖詩中仙信我同好出家寶晴

窗細檢正續全作者精意君古誼與我神魄交纏綿崇蘭

帖見苦晚冷吟夜夜乾舌本繭紙十丈膽接腕天皇縱觀

設九賓選德殿序旌先臣君守此卷未經進小崇蘭印下

筆親白鬢塵冠妙摹拓六法雲閒擅三莫崇蘭帖

話舊遊舊遊空復情墓門多宿草冠蓋滿燕京西湖送行

船三板車馬填門日苦短芷厓客曹侍郎竹虛事海波寺街菊不花

淚酒傾杯奠秋晚追慟我寶幢先生二十一車隨五台松下水仙

寒正開芷厓隨汪受時侍郎扈從事此亭海右與人古版冊清吟和八

哀芷厓與徐芳圃方伯唱和事話舊遊話未了將刀割水何日斷炊沙

作糜那能飽世路紆太行人情劇巖邑感恩不報頭雪白

僂指一生活不得話舊遊

苦畱行依依重別情舉杯殘月又新月肩輿出城還入城

津頭鼓鼙艇舟人喜遇風畫圖妙得滄洲趣攀我臥遊不

得去不種楊柳不折枝俗不競渡那有弄潮兒苦畱行從

此辭臨分斷續推篷話看轉船頭高閣下瓜蔓添流江雨

沉百倍桃花潭水深苦畱行

梧州城東準提閣可登眺嫌其名不雅馴更之曰

層江閣葉八春波承恩屬范生著色寫閣景於扇

頭為題十八韻

東城墻低外積水老葑築隄小石橋過橋憩坐短亭子三

間碑屋安山坳梯懸徑轉拾級上傑閣捧出千花梢軒窗

一帶面層水風起但覺闌干搖著色迺入范寬畫簷牙瓦
縫窮纖毫大江茫茫山疊疊雲霞蔚欲蒸城壕文章第一
真面目畫家最數神理超江山清空天洗骨多事點綴愁
鑄雕豈知坤維爭魄力物華天寶光難韜山重水復萬竅
號嶽走百靈海上潮元氣老更作妖韶青紅閃爍魚龍跳
李唐可比李思訓御藻特鑑高宗朝春夏穠縟宜渲染時
非秋肅何蕭寥我來登閣展畫讀袒胸一瀉皆雄豪改額
層江亦何謂要與古硯添波濤南水皆江此江好十年爲
我淘清操心肝久已浸冰井意氣尙欲騎金鰲眼前瑣屑
耐回首星鐘埵寺昏黃敲

贈蒼梧謝明府

廷書 四川
富順縣人

君家江水初發源我家入海之江干坐千山底望天上迴
流合并良已難一舟如萍梧江泊我亦忘是當年官歧塗
君迺善遇我每出有車食有單衙齋丙舍構精絕邀我花
月同憑欄戴星此地愧巫馬才自不逮心空殫十年凡六
易長吏石人見發臨江湍訟庭當日斷取女生兒踏浪如
走盤海潮更上一千里今春直打烏龍灘眼前事事摠非
昔往來豈不成衰殘白頭穿我望雲眼尙教袖手珊瑚竿
昨聞淮南貴米價明發展轉鬚眉寒但祝天河洗兵河清
瀾家書揚益同平安

時聞黃河隄決
而川廣方用兵

舟泊梧江通長老餉蔬果

先生自礪冰雪齒五年梧江一杯水僻宜僧廬聽煮湯洗

我在官廚傳腸東坡心肝滌秋月至今震蕩江流活神龍
游戲吸作漿與人肺腑通晶明叶山僧摘果手如鐵剝皮
潤我讀書舌對客三咽何不廉有味畧自知酸甜縣吏催
租逮僧戶倒甕翻牀莫傷樹

舟發梧江畱別王四雲浦士龍

斜城半壓茶山頂碧葉墻陰拭冰井側有何人結草堂五
月槐深日高冷我來髮白非心衰元氣畱入人肝脾銅鐘
古寺亂山曉淋漓大字書之碑人情好處攀清酌與酣夜
夜江花落交道難教驟別離天心未許淪溝壑君更閒拈
心字香當年聚塵羅澄與楊青飄零海打浮萍合老大人
同錦瑟長未須苦艤虛舟住送我城西日斜渡青山隨船

千古情昂首高天放歌去

北發初程別桂林

朝青雲士暮作囚來鬚未生去白頭火維觸熱汗不休偏
賺霜雪於炎州早年取第忝入流吏事不習拙自謀背道
馳反衣狐裘彊短袖舞那得優除名對吏爲世羞妻孥八
口從六幽衰慈隻影天南陬臨門催遣刻不畱文在何敢
狎壑溝一息萬鈞生暫偷寸絲無挂西極浮如泡在海偶
未收還能往取將相不倚醉浪誓酬恩讐

三關詩

蕭梁起自隨嗟之上流北敵縱橫南司州司州何年入拓
跋請官初從僑置說汝南幾日隳邊防蠶食來攻久義陽

將軍競病望已僵死蔡氣欲吞生王老馬當關奮雄嘶更
老不敵傅修期四山大呼并州兒拔箭更作窮日追三關
相須左右手三關戍將棄城走司州移鎮到西陵荆山外
方無一憑懸瓠連城纔內附螯弧六日又爭登是時南國
猶能武半壁江山嘯韋虎點軍荷鍤築安州其下淘河上
負土一將千夫自古論從知地利不如人僉謀競往封函
谷失計偷將啓北門平陽下殿臺軍債兩家後主宮廷紊
黃皇新封斗柄移金甌覆不由邊釁戰場髑髏語夜闌功
高骨枯不如閒半天隻堠連申戌二月繁花照楚山馬蹄
過雨微塵斂時平輕解風塵劍冥阨翻鴉夕照旗灑陽沽
酒春燈店關門中直長淮清沙底有無沉鐵腥渡夫搖船
指誇客此水千年洗甲兵

再簡耿汝州

我昨遇陶顧又至

從耿來俱江都人

相望舉手征塵揮故園花開

好顏色何來萬里從風飛青絲白雪變曉暮馬上見我疑

是非出書肯救溝壑辱高義感人今見稀明珠青玉未足

謝更爲遠戍籌庭闈餘生心重冷於鐵發氣被體融朝暉

二人自君所來者述君惜我不自肥鄉音遞舉所憶事老

屋舊遊情庶幾燈前細字更展讀對我故人如夜歸山河

阻遠動一紀清光咫尺終難依今者無端指西海望斷庸

福何可祈十生九死泛家水釣竿一拂清江磯匪我兄弟

別更苦鄭州西門望嗟唏祝君累勞柄刑賞倘能爲我言

天扉

闕鄉西門新作禹廟

搗不了新堂鼓千夫趾築圍墻土飛不了虛廊雨千指繞
 鑿香臺礎闕鄉西門黃河邊僉名率錢走男女年年大水
 不入城作廟昭功祀神禹中原承平金甲銷津塗久撤河
 陽橋一統志河陽橋在闕鄉西門外武功太白連華嶽一脈暗度為中條
 倔彊山根伏欲上觸抵水力更相驕軒皇髯絕不了事臥
 骨波心止湯沸石經百鍊媧所遺出補天餘屹補地萬里
 驚迴星宿源三州盤鬱龍門勢緬昔明德援黎烝宿嶽麓
 如坐殿庭岫嶠山尖紀載古七十有七字色青赫斯新廟
 踞形勝磨碑三丈神式憑螭首穩戴蒼水圭靈龜傲繫黃
 金繩文驅百怪永竄奔淋漓大筆誰所能遣陪泗鼎扛荆
 鼎點綴風陵媿羽陵吁嗟乎車箱畫肚字如斗滿腹瀾翻
 袖雙手

潼關

周秦函關固國計漢入武關乘形勢一從曹馬戰潼關兩
 晉六朝為要地唐度蒲津備東兵臨關橫鎖興王氣范陽
 賊至火急修杜陵太息潼關吏花門屯雪海不覺潼關隘
 凱師十萬回日射潼關開設險何須河華口我乘於人利
 在守不思萬古用一夫中使促戰胡為乎廟堂計疎敗哥
 舒後來更有孫尚書

鴻門

東西逐鹿麕繫組灞上真龍戲下虎七十老翁持睡姥酒
間二項揮短兵白光水寒爍赤精壯士皆裂重瞳盲擲還
箕肩半空吼當晝鬼掣拔山肘請置玉玦受玉斗碎之以
代沛公首何來雙璧不更嗔母乃貽自瀉池君慨然販去
掌上秦史記坐位錯三面能事如繪鉅鹿戰東門紀信乘
王傳廣武傷胸諱急變殆死豈獨鴻門宴

驪山湯泉

龍祭孕褒禍未止瀉作驪山滑柔水膩理嬌於出浴初靈
湯溫自承恩始異香不散綃不濡玉泉一色唾玉魚華清
別疏窮瑩映佳麗三千都被除陰盤地古春風轉御溝凝
處君恩滿不道虛無最上頭分得芙蓉帳中暖噓寒借燠

由官家浴日當空開日華炙熱天邊丞相燄流紅樓上五
王花御前列坐金雞幄鏡中新剝雞頭肉錦綉暄賜鼻兒
錢璽書急詔歸湯沐波底黃虬起縱鱗泉面巨魚長比人
千金野竄難離垢萬騎城昏不洗塵第二湯無雙色涓涓
細逐宮車出烈士膏塗凝碧池義軍血染陳陶澤青驪倉
皇衛士飢識成山鬼愁環肥看場何日纔前鞮禮佛無人
爲浣衣雨滴梧桐大同殿雨帶梨花海東院天上人間兩
渺茫一般淚洗悽惶面若論風景從傾城如何人去山常
青若道恩情似流水至今未輟行人洗却憶年年十月時
紅巾銜上萬年枝見形封豕頻酣宴錄異金蛛舊有碑朝
元閣閉稀來轍浸盛北司衰女謁渭水流將一代愁西京

從此無宮闕

蘭州留別張參軍春溪伯魁

我從南河溯天上到此欲度橫空橋
 夸父作劇忽倒走要挂西日扶桑標
蘭州蔡觀察廷衡長安費大令濬時為金納贖甚力
 短童不鮮馬不鬻入門捋鬚歎奇絕
 兩年辛苦賊中來衣上斑斑戰場血
 軍中馳疏嚴季鷹雲臺繪像董嘉榮
 紀事屢哦蜀道易有人一去雪山輕
忠襄福王 秋風秋雨金城陌
 暮暮朝朝詣閒客倒篋憑將燕石嗤
 凭欄遞把吳鈎拍新知最樂披心曾抱
 持放誕忘途窮酒間不辭作大戶意且自命為英雄
 浮生失路無南北浪死幾人稱老翁
 君腹便便東林寺一日平吞十萬字
君首倡雇書手抄拙集 滯留太史供著書
 白磨韓門出微

贊君命楊康二生從余遊

但許高歌動鬼神不問干卿定何事車聲

人聲河水聲送君出使君先行禰衡一刺仍磨滅公孫大

樹未飄零君時僦館大樹下杯水全噓澤州女杯酒還澆趙州土

生角馬頭會有時刮毛龜背曾何補請君食蜜中邊甜請

看如弦直道邊好官只可由人罵名士從來直幾錢各自

東西瀉地水夜行鐘鳴不得止何日同持左手螯何年歸

牧南山豕感千秋義萬里身那得僵臥仰承塵霜天更過

街西館燭淚題痕思殺人

出關

漢時關秦時月中貯有堯時雪咳唾無風落已冰
 羶裘作衣冷於鐵多恐鷹翅搏人飛將母馬骨和車折眼前可

盡天西頭底事披圖駭奇絕出關況更當嚴冬大地以上
皆蒼穹時清障埃如洗出不信前代曾羌戎平生五嶽陟
其二昨者更攬華與嵩太室天門凌孤絕一洗芥蒂平生
胸未若天山遠蓬蓬根柢亭毒延龐鴻此間元氣留不住
久歸長白同朝宗蒼莽萬里渾鐵色進却西海無終窮雄
遏崑崙不敢北方挽弱水迴流東武功太白度河底沍寒
冰雹中條封醫無閭首碣石足九州兩戒分當中天維地
軸亘華夏盡壓萬古青山空當年九日隕蒙汜不周頭觸
愁共工西北未傾藉撐拄此山屹走寒門風我

皇盛德踰八極古未曾有今奏功那容人過喜魑魅無復
客夜啼猩狻看山何處得起訖目力欲斷青而紅秦珠闐
玉都非寶谷量馬駝逐水草緯闕無聲星宿乾塵沙不動
風雲杳嗟人百年旋磨蟻賸我餘生失巢鳥醒千日酒沿
山歸開關拍手青天小

松樹塘萬松歌

天山尾萬柳紅

隴西多紅柳

天山根萬本蔥

天山西接葱嶺卽崑崙也

天山

之口萬樹松元氣不斷五丁手古春蟠結山當中中間鑿
空處不見草與木天祕蒼精洩無由奇到峰尖刺天腹忽
破天膜膏四流神堯以前無此綠松耶峰耶兩不降松身
高與峰頭昂我來但有松挺立積雪遍壓無山光雪意欺
松不教起松勢當空絕依倚氣奪天山以上天天俯接松
意未已塞水淺深伏沙窩山底亂流成塞河荒唐神物山

之上滿山皴碧翻層波松面峰頭倏向背馬力松風相進

退萬里南天樹海人直到天西泛松海樹海在廣西鎮安府屬外與安南接

界離奇藉撐西北傾山石粗耳松其精購者皮相松竊笑

卿相向我求長生松皮膏療疾價甚騰我撫松身得石理結交結

心有終始雪消雪滿自年年鑿盡天山松不死

送陳四孝廉本侍尊甫葑洲中丞入關

世間名士那有此匹馬從親萬餘里三年還復奉親歸為

人子者見亦稀君詩海嶽開生面北庭西頭憑踏徧袖裏

天山舉若輕纜割幽齋半邊研君詩詞稿曰半研齋草假饒漲滿墨

池雲造化何以當雕篆買絲莫繡趙平原鑄金莫事賈浪

仙家法東吳少保後行輩長蘆釣叟前當年湖海樓百尺

酣歌欲上蓬萊顛真宰元氣交障溼風雨戶牖都驚穿自

拈花鳥友于句月夜聽經皈善卷水繪園傾杏春禊壯悔

堂圯荒秋烟四公子家四易世君迺直接真薪傳往尋老

屋歸梁園不用更買陽羨田西陂魚麥侑彩舞比之棲鶴

猶榮焉才人情多君家最而況孝格蒼蒼天吁嗟乎同為

人子我更老望雲海東應門少

伊犁戍所哭前福寧總鎮烏蘭保

我初之官未進舍發船江干送兵馬江洲如月斗大城兩

家屋倚西城下金與總鎮同官梧州官舍止一牆隔鳴笳疊鼓君從征征南

丞相掩空營督臣孫士毅偏師整隊歸解甲日南戰血常聞腥

將軍金印擎忠勇樓船大呼樹海湧福忠襄王時封忠勇公先聲如

矢馳清華羽檄停揮色不動諒山三月蠻花香上公單騎
親受降螺卮滿酌十分酒願君持節張旌旛臨關

奏充護送使香象文犀萬餘里從古交人未作賓於今公
讌初成禮蒼梧名古介廣容嶺南東西道當中設重平席

百堂上下大酺長日歌三終君兵我嘉各執事

國體攸崇上公意衆裏班行散每遲幕中十手功同紀上
京往返役少休靜追勞苦情話稠江上共楫歲三周送君
移鎮邕南陬我亦改檄臨威州明年促膝推篷語打盡鼉
更坐春雨上公檠戟舊轅門沙外帆檣試重數別情從此
天之涯聞君專闖過仙霞望遠陰遮綠榕樹寄聲風剽木
棉花一官浪漫淪人海前夢都空剩君在先我秣馬天山

禾雪堆中兩年待人來迎我影碧流乘君之車披君裘

入門一吐癥在喉挂壁寶刀躍綠鞵橫腰錦帶珊瑚鈎老

將天西仍黑頭舍去聲我近在東城溝總鎮爲金覓寓於大城內東第一渠訂

遊不果南河樓隻雞絮酒中夜起侵曉攜過澆君愁嶠南

回首連江霧五溪毒淫來時路我生往事如浮雲逢人不

肯從頭訴君爲親切臚昔年道我差不忝爲官兩齟齬冰

噴作水清寒塞漠何人憐茶瓜隔夜款人客一夕呻吟死

灰色熱血男兒千古心臨訣相看代不得白頭慷慨出玉

門餘生支持留報恩拋將親愛就執友一人知我又不存

天意明明忌知己我或不來君不死無情最是黑山風吹

墮心旌萬事已君不見上公轉戰元功高轅門星落哭干

宵福王薨四年矣滿眼軍諮紫金袋當時部曲總戎貂

賜葬崇封多宿草魂歸拜公恨不早厠名何必更刊碑一
封討賊忠襄表

湘浦將軍館金於署內堊堂西之精室手書亦園

二字額其門敬賦誌謝

我公胸次具天地眼前華屋意所嫌但悅山梁空潭影有
園村郭剛相兼公餘園館作大字伸腕寧問素與縑傾河
倒海走元氣氣凌萬仞天山尖肯逐畫家競頭角轉邁甲
士疑矜嚴豪端最愛以神運於厚重處能虛恬閒齋數楹
方改築卻付老拙標書籤繁花星星種補院古木森森長
刺檐晝同靜侶鐺腳坐習爽禁挂堂前簾卽今風候歷盛

暑不知墮地朱光炎秋蛇春蚓自引愧枉同小學言詹詹
十年匏繫粵嶺外賺將霜雪生鬚髯幸於中流許勇退遠
遊淨洗塵容默高深迺不棄涓壤嗜好畧未殊酸甜古人
筆正本心正光怪煥發無時燿蘇黃米外不數蔡得師與
濫毋寧廉公之書法見梗概渾成近更藏鋒鉅高臺可夷
視平等九夷何陋須磨漸飽參迂疎亦何謂要與俗士加
鍼砭每尋讀聲聽忘倦如以鳴鳳憐魚噉天人迴抱九仙
骨感荷全忘三年淹門楣高榜凜起敬瓣香生世應常拈

寄表三靜齋璘在京師

將軍愛客魏信陵三千之士君侯羸夷門馬踏萬山上壯
遊遠赴烏斯藏湘浦將軍駐藏君隨幕四年餘炙牲寒瘦椎旄牛置酒椀

把名王頭將軍並騎促呵硯檄成解贈千金裘西招圖中
十五月一麾秦隴方移節揮餞聲停蜀國絃問塗驂絳征
西碣此時殺未搜荏苒此時急最先儲胥百函剛發朱齡
石又剔營燈勘羽書相君虎頭飛食肉從軍自古封侯速
入

朝荆督後車隨萬里安西肯追逐

將軍總制陝甘董師荆楚旋改授伊犁領隊君

俱隨

任蕭暫副蘇定方總管須宜王仲翔

將軍於壬戌二月奉命總統

伊犁共楫雅依窮塞主得人聲懾右賢王

將軍諭金留署教讀與君相得最歡

如山令出兼風雨掃署清譚卻歌舞

署中舊有歌臺

池艇

搖濺甲士裳檻花催發轅門鼓蕭疎竹館池之濱清渠碧
樹徑相循撒飯橋陰賺魚媵提壺帘底想茶人紛紛滿眼

皆遊伴離座披襟一長歎我有寸心燈比紅君心耿結天

當中丸泥豈果當累石春人可解窺心冬浮生聚散真如

夢驚風括地征塵動慷慨初忘去住輕低回漸覺情懷重

將軍密坐宴筵終我輩苦戀燈火共葛帔寒衣五月秋蒲

觴醉忍單車送

午日送君至蘆草溝

君賒心事東南海到處逢迎雋

游在銅臺雨踏故關槐潞舟米換津門蟹

君將赴閩訪迎先櫬時秦芝軒

撫軍觀察通州定為君東道主

征衣重綻恰明年下水江南二月天建茶

新采盪上口閩仔依人頑可憐君去交情那堪說有血盈

腔不能熱塞垣日澹勝幽州我心更澹如邊月將軍殫勤

展夙謨增墾營田濬河渠奉身祇取一杯水長物除非千

卷書公餘愛剪衙齋燭齋額分明嵌冰玉

將軍為君書水晶冰玉四字今

尙懸雲邊聲四起漏迢迢往事十年如昨宵崎嶇幾其經
林書舍寒歲形影真堪耐久要蚤免周防寬禮數或追高尙問魚
樵朝歌吳質終勞積京兆田郎孰見招我陪末座心如擣
彌信君能作人好落莫天涯賒墜歡悵望塞上失國寶玉
溪且省臥秋悲張儉端須出關早此身但合許真知此間
莫放孤吾道長言恩君還促君賢達京華應共聞較前更
事許吾友代維嘉客報將軍

